

四庫全書

子部

欽定四庫全書

子部

物理小識卷二

詳校官庶吉士<sub>臣</sub>汪彥博

員外郎<sub>臣</sub>牛稔文覆勘

覆校官編修<sub>臣</sub>汪鏞

校對官中書<sub>臣</sub>金光悌

繕錄監生<sub>臣</sub>黃廷璧

欽定四庫全書

物理小識卷二

明 方以智 撰

風雷雨暘類

風微 陸機要覽列子云立春歸八荒立秋遊乎風穴

風至則草木搖落謂之離合風古呼風之術有之然列

子御風亦是寓言括地志云龍穴

音脫

有四風穴洞之深

而通氣者類能生風不足奇也凡虛谷回峽而曲者吹  
裂笛直聲則風起長嘯之理即與此近余遊雁宕大龍

湫壁下老僧云羣拍掌呼風則風起果然按風術墨子云以丁卯日或乙卯日燒三雉羽揚其灰風立至若立止則又燒黑狗皮揚灰風即起萬畢曰焚雉羽可以致風狼糞為烽燧大風不折江狔入火藥逆風不回駝知風與颿母事別見陸游曰嶺表有瘴母起時園黑久而漸廣所謂孟婆颿母也

智按說文颿當作颿唐有颿海道可證

太西曰太

平海無颿風滿加刺則無風凡風之暴烈乃峰島土竅激氣而發者也王柏云抱地旋轉而為風此論其槩耳

暄曰凡動即生風張扇之鼓爐也人行長巷衣何以動乎陰陽相驅即有動氣連房密室中坐二門間則冷氣襲人此與拍掌吹笛可以類推

風行遠近 大塊噫氣為風然孰為之噫王柏曰陽迫陰而出耳春風上升秋風下降夏風橫行冬風著土而吼穴此以四時論行法也夫春期何嘗不靡草秋月何嘗不飛箏乎風之高者其來遠風之下者其來近此以高下論遠近也夫豈無一時而高下並至者乎鳴葉者十里鳴條者百里搖大枝者五百里仆大木者千里折

大木者五千里此又以大小論遠近也夫搖枝折木亦  
視陽夾陰之甚不甚發之暴不暴耳狂飈乍起曰風頭  
豈無近者急而遠者緩乎惟以時之久暫計遠近者為  
僅得之

暄曰風一日者五千里一日夕萬里二日夕天  
下半之三日三夕天下盡風然風之行亦有遲

疾微風飄忽豈無日夕止百十里者乎暄嘗于野郎午  
炊得小北風逮夜及新豐則一晚之間僅四五十里耳  
中履曰驗風送帆已費風之力矣朱子曰勁風旋轉  
不停以天行之疾言之風亦有至疾者何如天行之速  
耶彼不疾而速者又何物耶氣凝為水而下  
流與氣聚而驚之為風自在差別中判

南北風寒溫之異 問千里不同風吹噫一也何以南

風溫北風寒天學曰風屬于火日為君火地發燥熱橫  
被直驚從日而噓則為南風君火之氣與風俱舒故溫  
從日而吸則為北風君火既縮而又吸動地面飄揚之  
氣故寒試觀人口噓氣則唇溫吸氣則唇冷理可類推  
中國所處日常在南是以有噓吸之異又問東風溫潤  
西風高燥何也曰海氣在東故溫潤山氣在西故高燥  
又日以東方為來氣以西為去氣斯其所以異也愚者  
曰東生西殺南溫北寒此常理耳

暄曰火死則吸如閉  
火于瓶如于人膚而

不墜也日居火有死時乎同一氣耳鼓之則涼噓之則暖吹之則寒同一噓耳近之則暖遠之則寒日在南故南方為近日北方為遠日日在南故風從南來者恒暖風從北來者恒寒非有噓吸之異也

雨徵 熊公曰竈突發煙平遠望之亭亭直上晴之候也蜿蜒而起如欲上而不得者雨徵也蓋雲將成雨空中氣行皆成濕性煙為濕礙不得上升故至宛曲將雨礎潤將雨燈爆理可同觀朝日出光黯淡色倉白者雨徵也日出時雲多破漏日光散射者雨徵也密雲四布牛羊翫草如常者不雨若啖食匆遽似求速飽雨徵也

蠅蚋蚤蚋多遽啗食雨微也螺蛸之屬倉皇飛驚雨微也穴處之蟲羣出于外雨微也朔日至上弦視月兩角近日一角稍稍豐滿雨微也日暈白主晴赤主風色如鉛者雨微也潛老夫曰古人舉之矣京房易飛候曰晦朔弦望雲漢四塞當雨雲如水牛黑羣羊飛鳥五日雨北斗獨雲必雨如兩人提鼓持桴為暴雨諺云月暈風日暈雨東鸞晴西鸞雨下垂地曰白日幢烏洞返鳩主晴光日生兩耳斷風截雨日落胭脂紅無雨亦有風日

落雲裏走雨在夜半後月弓多風偃瓦自下河作堰女  
作橋合羅陣風雨飄魚鱗不雨亦風顛冬斑卻是護霜  
天皆是實徵非數占之例

暄曰月生齒星芒角滿天星  
搖動天晦若低小星白如欲

隆螳蛭封高鷄舞魚浮水面池塘綠泐琴聲不清鼓音  
不亮日酷無風背心獨熱皆雨徵蓋雨者濕氣之行故  
屬濕之像皆應之而日酷背熱則又水生于火變濕之  
兆也有曰雲如車蓋十餘乃陽火之氣必喝而落氣如  
煙或青或黑或黃亦陽火之氣也雲如魚鱗名曰老鯉  
斑者必喝于晴候五更忽雨日必晴雨候清晨日出必  
復雨惟先雲而日漸出者晴乃準也 中德曰月令廣  
義正月首十二日每旦以瓦瓶秤水重則雨多輕則雨  
少蓋水有潮候月有變遷此亦難決也中通曰當以冬  
至後數九秤而決之 中履曰雲掩北斗口有雨此以

北陰占之凡所云南耳晴北耳雨南閔千年北閔眼前  
雲往東雨無蹤雲往西馬濺泥雲往南水漲潭雲往北  
好曬麥皆以西南東北為斷然又冬夏不同南北之地  
亦不同如自楚入豫春東北風亦不雨江南北先雷風  
則不雨桂林每雨必先起風黔多雨滇  
多西南風其類未可執一各自有說

雨異 史載雨粟博物志南陽小都雨穀如麥粟味苦  
大者如米豆黃赤味如麥食之除心氣患此他處吹來  
者其載雨肉如肋或載雨血則似之而實非也楮記室  
曰至治元年雨鐵則雷楔隕石之類耳天啟癸亥智隨  
家君都門晝晦雨血以著衣而色赭也

祈雨古法 董子言土龍祈雨之事王彥威驗李玘以  
白蛇醫二甕青衣小兒擊甕致雨之事舊說有泥楓人  
而環呼蜥蜴者此也成式目蜴與蛇私為親家智按異  
物志曰魚躍蜥蜴從草中下共浮水上而交蓋與龍通  
氣也蛇背傷蜥蜴輒銜草傳之或以口所含電療之故

號蛇醫

一說純黃色

潛山下九井旱殺犬投其中遂大雨

暄曰

潭中有龍處投鐵雨立降 中通曰或取即且燕蛙膏  
血茵草而投潭中必大風雨溢潭而後已一日龍淵投

虎骨龍  
即起

雷說 陽在內而欲出故聲朱隱老注邵子書言八種

雷本草載霹靂楔治驚失心殺蟒止洩置箱辟蛙陳蘇  
紹得雷鎚重九斤宋沈括于震木下得雷楔似斧而無  
孔鬼神幽微不可究極愚者曰此亦通理因而曰皆心  
也皆鬼神也亦冒通耳質測家曰火挾土氣而上急迫  
之際火焚而上附天土成澤而下星隕為石亦非星也  
時珍言龍口有火光皆非火也燥鬱而氣旋則為閃光  
高峰視其下雷雨如漚發非明徵即燒樹及物陽從直

起觸之則焚焚則有焦焦則如墨耳雷書劉恂以鷺石當之李肇言雷州多雷秋則伏蟄人掘地食之妄矣此

自雷州近陽土中生物如封之類

暄曰雷乃太陽之氣升于雲中為陰氣所

束陽氣屬火雲氣屬水以水淬火與相激爭故發為震撼而觸之者碎以其陽氣故春生秋成北方寒有無雷之國南方熱有無日不雷之境也或云雷有如鳥如豕如猴諸異相能殺人此乃陽氣所生之物乘陽而出故渾身屬火猶水中生鯨鰐能殺人人亦得以制之耳有時夾于樹中鋸而後拔有時入于人室不能遽出有時伏地如蟻掘之可食楊道和鉏折其肱趙陞將與之相格雷州民揮刀踏之血流于地服正遇之魚佩踰次之羽半石之草皆得以卻之遺楔如芥固煙與火土結成者也觸人作字則煙暈汗流黑晰相間者也曾見三丈

之內發無彈之藥銃中人人為火氣衝仆其面黑汗成  
文不可推即至于附氣靈應神之格思不可度思茲且  
窮實

測耳

電 史載電毀瓦如拳如雞卵三出成獸徐鉉稽神錄  
言電與樓等嘉靖戊戌吳城電開眼西山電如斗天啟  
甲子電如人眼凡電治狂熱正醬味然無病吞之則疫  
元光元年七月電董仲舒答鮑敞曰電陰脅陽也氣上  
薄為雨下薄為霧風其噫也雲其氣也雷其相擊之聲  
電其光也二氣初蒸攢聚相合風多合速雨大而疎風

多合遲雨細而密寒月則雨凝于上體因風相襲成雪  
寒有高下陰氣暴上雨則凝結成雹焉霰之流也敞曰  
四月無陰十月無陽何以明不孤立耶董曰所資一氣  
也猶一鼎水未加火純陰也加火極熱純陽也純陽無  
陰息火水寒則更陰矣純陰無陽加火水熱則更陽矣  
葶藶死于夏款冬華于寒水有溫泉火有涼燄陰非無  
陽陽非無陰也曰冬雨煖夏雨涼何也曰冬氣多寒陽  
氣多上躋故人得其煖而上蒸成雪矣夏氣多煖陰氣

自下升故人得其涼而上蒸成雨矣愚者曰漢初董子  
早精此理故載之今以三際質測急切成就抱氣在中  
故電常具竅

霜雪 霜前冷者陰氣在先露遇陰逼而為霜故先冷  
也雪後寒者陽氣在先水逼陽死而成雪故後寒也雪  
花六出者圜一圍六同體相依直輳即離平輳即合此  
亦空中旋氣使然也

露為夜候之常故空冷而成霜先  
暖而起同雲變北風而成雪春五

出以暖而  
稍化耳

天漢 以遠鏡細測天漢皆細星如郎位鬼尸之類靈  
憲注曰水精為天河謂星為水之精也周易時論曰河  
漢同坤艮之維今按之周輪金魚海鳥與井參之間箕  
尾之間相接矣黃帝素問以戊己望黔天之氣而表五  
運蓋其指也微哉

凍成花鳥草木之形 嘗見紀載河凍有魚龍花草形  
或在屋瓦上有之類以為祥異格致草曰崇禎壬申臘  
月余樓簷瓦凍為花草獅鳳之形嘆曰蜃氣象樓臺廣

野氣成宮闕是凍亦偶然合之如雨豆雨麥偶象豆麥  
耳松蟲之毛象松柑蟲之色象柑濕熱所蒸頃刻漫山  
布嶺耳目口鼻腸胃畢具可以通觀又如落星為石象  
狗首便曰天狗不知是火吸土氣或至火際一經鎔煉  
如陶土成甗故初落熱不可摩又見星石久藏變小亦  
緣火初煉土急切成質苞含有氣久則氣消而質自斂  
電竅亦然雪霜霧露之後微風飄漾往往成紋耳愚曰  
光氣與形象互成既有形象必有所肖何足怪乎

暄曰  
廣昌

劉李夫丁丑春雪凌數日殿門貼梅花瓦覆蓮花野  
老曰豐兆也蓋雪凍則土堅雖絕而芒種時有雨耳

虹霓

老父為南璽卿時夜無月而見斜暈如虹范質

公大司馬問其故老父曰天地體圓日光又圓故凡暈  
光無不圓者特斜見于地上則橋起半規耳陸農師嘆  
日微之是也夜見者空中別迸火光如春秋恒星不見  
之類其光穿地則為五色暈矣范公問其占曰以端幾  
類應而言為陰勝陽或曰淫微何也曰因古有虹為淫  
氣之說也方士于東海見虹處掘地得紅蟲為媚藥亦

取其類應耳

彗滿空皆火近天極熱如窖中無光投物則發光耳

此皆地氣逆上帶物入此熱際而火光逆射其久者氣

結厚大隨輪天轉去地尚近非列宿之天也占為掃舊

布新亦以類應言也大風雨則解萬歷戊午彗射紫微

謂之蚩尤旗

舊說天使天暉天雁天保祥也地鴈梁星營頭天狗妖也爾雅曰玃約質測之皆空

中火逆大

則芒彗耳

黑子日中黑子蓋恒有之或見或不見太白有二黑

子填星有四黑子旋轉其上其暈而為黑子者則光所  
暈也其以占言者亦以人心觸幾而以時日斷也左藏  
一言于夕陽時見滿天黑子回首向池中觀之最明飛  
動不一踰數刻而散

中通曰金水二星附日為輪正在  
日下則為黑子其大小相關則光

暈暈出者也滿天黑子乃陽光忽微其  
星現為黑影入水氣暈故飛動不定耳

已疾諸火 灸艾火者宜用陽燧火珠承日取太陽真  
火其次則鑽槐取火為良若急卒難備即用真麻油燈  
或蠟燭火以艾莖燒點灸瘡不痛金石之火烈于草木

之火是矣八木者松火難瘥柏火傷神多汗桑火傷肌肉  
柘火傷氣脈棗火傷肉吐血橘火傷榮衛經絡榆火  
傷骨失志竹火傷筋損目也梁書載武帝時有沙門從  
北齊齋赤火來其火赤于常火而小云以療疾貴賤爭  
取之灸至七炷多得其驗吳興楊道慶虛疾二十年灸  
之即瘥咸稱聖火外紀云納波里有火山百洞入洞皆  
以療疾

死性之火 炭者火閉氣而死者也無生性故葬用之

麩炭灰斷蟻路可驗也冬夏二至前以土炭垂兩端陰  
氣至則土重陽氣至則炭重收茶于瓶麩炭置上濕氣  
不入墨膠硯滑麩炭可以磨之本草焙炙用麩炭者取  
易息而力和也觀礶之毒可知火各有性鏡源曰麩炭

啞肺而釜底煤能消火

暄曰釜底煤能收暑熱猶油餅能食油膩油膩出于餅見油膩

則收以其枯也煤為火之窟宅見火則收以其死也麩炭亦然彼附子參芪過炮無補有損亦可知也中履曰煎油鍋有時忽燃若入滴水與投菜物則其焰愈張惟以鍋蓋蓋之則息亦閉火之理也

貯火油與滅火法

宋康譽之昨夢錄曰高麗之東出

猛火油盛夏日力烘石極熱則出液他物遇之則為火  
惟真琉璃器可貯之西北防城庫掘池蓄猛火油不閱  
月池土皆赤黃又別為池而徙焉潛草曰南番泥油水中  
不能滅乾泥龜灰可撲四川井油見水愈熾周顯德中  
越裳獻猛火油三佛齊獻火油皆同一類愚者曰水中  
生火所以水不能滅惟細土可以熄之物理所曰火發  
房屋可投雞鴨卵及大泥團石碑衙扁撲之亦止其畜  
水激輪飛注者上也種鳳尾蕉辟火愚者見屋焚蕉枯

者多矣種成高大可殺火勢亦火龜山雞襍火義耶

焦火

受火釘理收火氣耳燎原則傷隆慶張祉投碑息火

石竹火

破石以鋼鑪刮之則火星出紙煤承之即燃

取火于竹以乾竹破之布紙灰而竹瓦覆上竹穿一孔更以竹刀往來切其孔上三四回煙起矣十餘回火落孔中紙灰已紅石火烈竹火易取常用無毒

續火

杉炭麻楷草紙易燃留火則棗蠟類也馬觀載

遲遲有打魔香乃樹脂遇火即燃以塗舟水不能入外

紀渤泥在赤道下片腦極佳以之燃火雖沉水中其火不滅直焚至盡

火異 青布衣大紅西洋布及人身之衣氣盛者皆能出火都邛三餘贅筆曰吳綾出火工家多以脂發光人服之手摩蒸鬱宜發光也劉乾監居庸草場火從中起以前積時冬有泥雪堆疊蒸鬱故發火老樹出煙以至雷火依之而起者亦以根枯氣通陽氣從下至也晉惠羊后出火女子積思發火焚身則人身心有火鯉魚石

首魚樟腦獺髓能水中出火石灰油紙釀酒皆有出火之理唐西域所貢火玉即登真隱訣云江州高安縣之燃石也以水澆之並可燒香以鼎炊物可熟置之則冷蘇頌曰密州九仙山有火玉擊之內有火南中志毋斂縣有剛火又古石山有石鑛火燒之成流支鐵甚剛孫水入馬湖處有絮石火燒成剛鐵又一種也阿耆婆池在泥婆國吐蕃西其池周二十餘步以物投之即生煙燄縣釜炊之須臾即燃塘煨池在遼東北有太宗烽火

臺五里間有火穴名塘煨池夜明如晝或有物去池三十步無巨細脅入池中物類志引作煨塘池按藏經言火城中塘煨可證當時語格落蘭得之地多火砌磚石而居之仍作溝以通火熱物即蜀中火井可證也雷火焚所及金石銷鎔而漆器不壞王虛舟物理所曰雷火焚砂石佛火焚金鐵于他物無損存中曰雷火鎔寶劍而銷不斷莊綽守南雄大雷破樹而福惠寺普賢像亦裂獅子金飾與像面悉消釋而其餘采色如故

暗曰可知  
無物不有

火性觸之摩之積之而發然陽火尅陰陰火尅陽類有不同耳 中履曰唐劉餗曰江寧有晉長明燈青而不熱則寒火類矣正與赤火對燒酒染青衣可點之以送客而衣無傷

陰火潛燃 徐兢記自四明之高麗黑洋夜火熠熠李

元陽記西洱冬夜起風水而火高數丈洱水鹹自分水崖下河魚不入與海同故也曾弗人曰呂宋客言船上夜以淡水茶潑海則見火起小西洋一處海火夜盛持器汲起滿器皆火光滴入掌中光亦瑩然可玩

野火塔光 格致草載西言火在地上而物則明春夏

之夜多野火人稱為鬼燐而從深山大谷見者曰佛燈  
聖燈云夫野血化為燐腐草化為螢具以氣質淩灑土  
上為風雨日露所滋照其質雖化其氣尚在故或為螢  
或為燐春夏間地氣上升火隨地出然得風日疏散使  
其上歸晶宇下歸地中則不作光怪惟久雨乍晴上下  
皆有冷氣致火不能散去橫鶩地上偶逢膏膩之氣則  
燃而成光或牛馬人畜血濺之處膏膩稍重光遂轉大  
一等鬼火燄幽數點聯珠人逐之則退人去又復依人

者理亦膩氣所致體質輕微人行衣衫動處皆有微風  
逐之則風噓故退反則風吸故復依人一等在墳墓上  
出入又或在荒壇冷廟遞相傳走蓋墳墓有尸氣之膏  
膩壇廟有燈燭牲血之膏膩也至于地火燒禾更常觸  
類此必久雨乍晴當夏而冷乃有之田面既有濕氣又  
有陰冷氣在空中當夏火氣不能疏越逼入禾苗如腐  
草延燒農家急放田水令乾乃可免蓋水乾則下面冷  
氣滅火氣疏越不至燒禾葉理也故軍中刀鎗上火起

其理亦與野血同又曰塔放光者地中真火以上騰為  
本性而壅閼和合于土上故蒸為溫氣發育萬物風雷  
雲雨霜電虹霓無之而非是者上騰之性每依直物而  
起偶此塔有蘊膩凝滯之氣相觸則附麗發光與野燐  
同理試觀乎雷亦火也每依牆杆棟楹有披擊出聲而  
上者可觸類也王虛舟物理所曰峨眉五臺佛燈偶飛  
近人手搏之皆樹葉非其證乎佛充滿于法界謂之佛  
燈固宜人身有光特不槩見其異者亦有壩上龍文五

采之類彼菩薩佛像頭上每作一團光非無故也石首

魚仙人杖白茅根桃膠皆夜或放光

暄曰太陽之氣為濕所鬱則生光故

附于物朽木腐草螢蟲生之附于水海濱江湖田澤生之附于氣則為野火陰火或聚或散與雷火同理不必脂膏血濺也若必脂血則廬杭之野燈常萬炬海中以杖擊之其光燦然臨邛火井及薄火洲萬年如是何故哉也

空中取火法 爾雅艾冰臺郭注邢疏未嘗言取火之

事陸農師乃引博物志云削冰令圓舉而向日以艾承其影則得火故名冰臺敝座師楊用賓曰凹者光交在

前凸者光交在後然則琉璃有火齊之名亦以其光取火也若以燒料作火圈珠以紙艾等承其後即可得火西齊里亞有巧師名幾墨得曾鑄巨鏡以燧取而燃艘中通曰火本無形藉物發光或兩物相擊而出或兩光相照而生無處非火但不見耳如鐵擊石竹擊木舟擊水皆有火出物透明者毋論水晶琉璃琥珀燧冰臺凡物圖形皆能取火日射物中物中必有一日日本圓體遇圓物則光聚內外相照光必相交四交于前凸交于後故于交際得火也

改火 王劭曰炭柴草木煎煮氣別則改火去疾可推唐重寒食司燿法存春以乾榆鑽乾柳四時一例魏子

才醫痰有驗吾桐趙公鉞曰勞薪可識青赤分殊何為不信

地類

陽氣生地脈 多埋石疏者其地煖泓禪師告張說造地法可類推之愚者曰地中火氣行遇濕凝石即成地脈物惡冷而向煖屋北有高牆則人煖而氣旺氣旺則外不受侵以雄黃椒封壁足以遠濕乘生氣審藏聚即此意因而嘆曰生我之骨月能陰後世子孫人信之矣

然則此心陽明之神能自蔭其後世何反不信耶

暄曰  
葬家

棺多置硫則氣煖久蟲蟻不生屋北牆煖  
在赤道之北則然若病疫傷暑又當穴牖矣

水患說 人以水生以火死蓋以水火交而生以水火  
濟而養以水下流火上炎而死也天地開時初有水荒  
天地壞時火急生風而吹壞矣一元中之一會其始亦  
有水厄太西言洪水時亞你墨尼亞為甚猛雨四旬地  
面全沒止遺諾厄數人考其時當帝嚳之八年壬辰云  
中國洪水在堯時是一徵也林孟鳴考堯時水患有十

七年揭靜叔考有一百五十八年引竹書堯十九年命  
共工治河六十一年命崇伯鯀治河六十九年黜鯀七  
十年錫虞舜之命七十五年司空禹治河八十六年司  
空入覲是則先用共工治水次用鯀皆以堤水無功而  
導之成功者實終于舜攝之己巳歲也舜歷試後乃使  
治河書所謂納于大麓孟子所謂舉舜而敷治焉史記  
堯使舜入山林川澤暴風雷雨帝行不迷蘇氏曰洪水  
為害堯使舜入山林相視原隰正與尚書孟氏之言合

而孔叢桓譚乃改大麓為大錄張萱以為壇會諸侯徒  
爾紛紛不知舜實治水也益烈山澤水氣盛火氣微故  
用烈刊木便相視亦用烈國語共工從鯀四岳從禹疏  
川導滯史記殷世家契長佐治水有功然則禹之治水  
益佐之岳與契又佐之矣國語太子晉云共工墮高堙  
卑以禍天下皇天弗福共工用滅有崇伯鯀稱遂共工  
之過堯用殛之羽山虞書曰靜言庸違象恭滔天言水  
不治也愚者曰古時水患甚久當營巢時亦有甚不甚

史書頗簡今合觀之瞭然矣治水之法隄遏最下導之為上孔子贊禹曰卑宮室而盡力乎溝洫溝洫即治水之上策也何待賈讓畫三說耶張江陵居正在政府集門下談治河刑曹商為正獨無言公問之商曰河不可治江陵默然以為得遂遷御史愚者笑曰關並謂禹治水時空平原東郡以為積瀦以入東北海其勢易馮遂欲濬屯氏賈讓欲徙冀民皆因而導之之意也然有說焉以安堵之郡邑讓河令可行乎人各護其土著誰肯

無事而徙其田宅耶是與羊謀其羞神禹所不能行也  
縣官歲費數百萬徒潰中飽不如已之聽其決後乃下  
哀惻之詔為之移措安置當委之河者竟委之旁分浸  
淀者旁分之豈不永遠安瀾乎哉是在明君哲相不言  
而默運耳

水忽清忽變 菽園曰渝水明耀浮光上燭次早視之  
宛如豆汁踰三日始澄清則火氣忽從此騰出如將雨  
而池面變也黃河之忽清或以為有神物澄之其實乃

地中之清泉潢出而清也建炎己卯清波門竹園湧血成池乃水濁赤似血耳論其理亦熱蒸所致火氣溽發如麴之漚紅也

弱水死海 弱水不載物乃氣下旋急吸也死海不受物以汁厚上衝氣急也外紀曰度爾格內有國曰亞刺比亞有一海長四百里水鹹性凝不生波浪常湧大塊如松脂不能沉物不生水族名曰死海

地生毛 齊世家謠曰視地上生毛晉志咸康初年及

太元二年十四年地皆生毛京房孫盛皆曰人勞也宋  
紹興三年八月浙右地震生白毛韌不可斷王振之時  
紹興府山移平地地動白毛遍生此乃地中之氣因埤  
衝破故陰濕生芒如毛其韌者其氣蒸急而堅也如菌  
之出有脆者有堅如芝者

水行洊勢 習坎言洊至佛言滴滴相續而成水浸在  
下流然有江漢漲浸月餘而金陵淮吳不浸者可知其  
洊矣至于流迅而激引之則水不自知其上下惟其閉

于筒內而有出路耳閉于地中吸上山頂更何疑焉

日暄

物空浮疾水湧水遲故外浮者恒倍于內中流者恒迅于邊流行之水力于停貯之水湍激之水力于流行之水

水鬪水立水斷地湧色變之異 左傳魯襄公時洛穀

鬪紹興中田水直行平地數尺程氏井溢二水相鬪徐

禎卿異林云弘治戊午蘇杭湖池水忽騰沸高三尺久

乃復張元長言東西洞庭相鬪氣湧水波千里喊沸而

濱湖一館中硯池亦應之其水陡然立起楊大權言萬

歷壬午七月大風雨楊扇湖水東吼壁立如城垣湖西  
頓涸居人亂走其上得古器古錢甚多久之風止湖水  
汨汨而下無倒瀉狀愚者曰老父記萬歷戊午馬湖青  
羊二江合湧逆上岷江水立數十丈周勒卣言花瓶水  
溢其井亦溢蓋气起相應也

金罍子言正德壬申海溢城邑水湧二丈歐宗衡曰

萬恩丙辰端午贛河驟漲千里城舍淹沒魏冰叔言寧  
都蓮山頂佛座下有泉眼雷雨則溢出甘健魚言南豐  
軍山頂泉溢為歲祥方中德曰京房言井溢道人死耿  
恭得泉為忠感然泉溢出乃常理也交桂水下肇慶常  
浸已丑五月金陵以下海嘯水湧十餘日若蛟起壞村  
舍更不足異矣

戴移孝云揚子江曾斷流一時許沈

天士云甲午年寡婦磯下有渡船過江見江中心乾到底久而後合中通曰此或江驅洲沙擁起繼則推去耳  
暄曰水乃陰類故月臨潮起適有陰氣與月類者聚而蓋水上則水湧立聚而居二水中則水交馳相遇即鬬氣抱迴環則立如城垣氣從地內鬱發則水自瀑起氣從江心衝出則水或斷或分第氣有陰陽攝者陰而衝者陽耳壬寅七月新城鄉忽從地湧出崩山凡數十里紅黃如脂公刻言癸卯九月江漢水漲自楚達金陵始至色黑如醬浸三旬退

潮汐 山海經以潮汐為海鮪之出入藏經以為神龍之變化葛洪以為天河激湧金樓子以為鯨謬矣博物志云潮繫日月若鼎之沸元耿伯宣謂方儀之運大水

承之氣有升降地有浮沉而潮汐生焉皆臆言之也至  
元吳彥壽答起崖書謂月與水陰類相應張封演曰月  
周天而潮應古洲曰朔後三日明出而潮壯望後三日  
魄見而汐湧每歲仲春月落水生而汐微仲秋月明水  
落而潮倍減于大寒極陰而凝弱于大暑畏陽而縮陰  
陽消長不失其時故曰潮信即潮汛也每月十三二十  
七日曰水起是為大汛各七月初五二十日曰下岸是  
為小汛亦各七日久晴雖大汛亦不長凡潮生則水長

但期至有遠近鎮江至大海五百里十八日辰時潮至  
浙江至海三百里則十八日丑時至潮之大小隨月月  
高潮小月低潮大瓊館志江浙欽廉之潮皆有定候半  
月東流半月西流潮之大小隨長短星不繫月之盛衰  
明州潮月加子午則長朱子曰余襄公言潮汐甚詳王  
清臣揮麈錄曰浙海門有赭山龕山溢于沙渾故猛而  
為濤非徒狹也邵子曰海潮者地之喘息也所以應月  
者從其類也徐明叔傳墨卿高麗錄與姚寬耐得翁就

日錄皆主元氣呼吸之說但謂地浮水上則陋矣朱隱  
老言月麗卯酉則潮應乎東西月麗子午則應乎南北  
采珠者入海底間遇潮則水湧而下虛焉潮高十丈下  
所虛亦十丈以水則虛以氣則實采珠者中其氣輒病  
地之喘息寓息于風生氣也寓潮于水死氣也太西曰  
月為陰精與水同物凡濕潤陰寒皆月主之既為同物  
勢當相就如呼吸然潮長之時江河以及盆盎無處不  
長長則氣入水為之輕潮降氣出水復故重今人以瓶

盛水每日權之輕重不等亦此故耳獨小水之處升降  
甚微人所不覺也水族之物皆望盈晦縮故月虛而魚  
腦減月滿而蛤蚌實也草木資潤無不應月月滿氣滋  
月虛氣燥故上弦以後下弦以前不宜伐竹木為材易  
蠹生氣在中也張僧鑒潯陽記雞籠山湧泉如潮朔望  
尤大番禹雜記早潮下晚潮上兩水相合曰沓潮而潮  
亦有異者暖姝由筆曰廣東海一潮韶州有雌雄泉兩  
潮柳州昔相嶺西麓下有潮井廣百畝一日三湧三落

張佳胤記滇大華山泉曰聖泉一名海眼應子午卯酉而潮曰三潮者夜不見也外紀元毆白亞海潮一日七次元中記貴州城外有漏洑一日百盈百涸應刻漏或云五十盈五十渴安寧州有潮泉一日三溢三蘸連州水下流有斟泉一日十溢十渴尤異者輿地志移風縣有湖雞鳴長旦清如吹角每鳴應潮至虔州瀟泉旁數里有泉日三潮崇禎後不復至楊穆西野雜記錢塘江隣海口有子午潮不爽諺云潮過夷亭出狀元宋末過

之果出衛徑自嘉靖甲午以來不惟不過夷亭錢塘江  
邊或旬日不至時人謂之凍死潮宋末潮不至亦可知  
矣愚者曰人日夜五十營萬三千五百息一呼一吸脈  
且四至水當火烹百沸百止亦氣之上下也潮之應月

月行有南北陸地異或不同耳

暄曰月為水精以月主潮者是也月之所臨則

潮氣為正攝月之對衝潮亦起為反攝月之氣從前順  
虛至對衝而極極而不能前則聚聚則盈故月之所在  
為一月月氣所聚又一月也月與水如磁之吸鐵珀之  
拾芥月遠地而行潮亦遠地而行月行天一周潮循地  
一周是天地內無地不潮無刺不潮也然氣不入則水  
不起故地之呼吸尾閭泉源之轉變亦由是而起矣星

亦與月類夏日無月之夜星辰白繁則地氣升而為露  
草尾皆有露珠亦潮也而必以月為應者則月之氣大  
耳或云伐黃楊于無星之夜為枕不裂取其體本燥也  
所異者地有南北月有高下或空際為陽氣所隔或地  
中有關塞而他徙故有不至氣行于大處則一躍而至  
行于末處遠處必連躍而後至而撒水碗者其此一撒  
之力无浮水而始則大躍繼則連躍以行達  
而銳盡也至哉吾安山師之以脈言潮也

水圜 金幼孜北征記永樂征布尼雅實哩至濶海灣遠

望之其水中高如山近處若極卑白浪隱隱自高而下

周千餘里幹雍臚胸七河注其中賜名元冥池

暄曰地  
形圓水

附于地者亦當圓凡江湖以及盆  
盎之水無不中高特人不覺耳

沸珠泉 南城上塘甯氏田中有小池一泓泉自沙中  
滾出數百線直上胡文穆廣言坪下有沸珠泉愚按濟  
南金線泉亦然爾雅曰灋大出尾下如濟南趵突泉河  
源星宿海同類沸珠金線則其細者也遼外有灋沙泉  
山下出泉 金生水者金石同出于土金卅亦石也石  
乃土骨生水山脈隆起者陰行陽長堅則為石耳  
暄曰山出泉乃石生水如人身之骨節必通髓路也 中履曰南方泉多如匡廬絕頂皆有泉北如太行太華必山腰以下乃有泉井則有十丈始得泉者

水味不同 江水定清可比惠泉者以其淡也梧州冰

井水與惠泉同味梅雨水雪水味輕東坡云天落水炊

飯白米紅紅米白

詳前  
水論

烹水法 北水重于南水泉水重于江河水宜多一沸

則養人

中德曰凡烹若泉數沸澄之再烹則味甘水烹沸以漢中沫為末投之沸即止

貯水洗水法 盛泉水宜載其小石一二甕須置陰庭

覆以沙石使承星露則英華不散羅廩曰梅水後不堪

飲大甕滿貯乘熱投伏龍肝一塊收泉水壞燒炭投之

即如故

輯曰有洗水法泉水壞汲江河水攪而洗之久澄泉重自歸下江河水自浮上先依原水之高

下窰窰至此洩之

所存水倍甘于初

澄水

贊寧云阿膠澄濁不獨補血也東阿井濟水所

漬煎黑衛子皮成以色綠易碎者為佳凡水污濁不堪

投少許于中即清尋常定水白礬赤豆杏仁雄黃石膏

皆可若池水渾濁以瓶入糞札之以箸投水即清又池

中置牛骨則水不涸

試井

凡家井閉氣秋夏中之殺人先以雞毛投之直

下無毒迴舞而下不可犯當以醋數斗澆之方可入凡井水沸溢不可飲于三十步內取青石一塊投之即止又平明望氣所出掘之得泉或以燈懸坎中亦辨水氣地中多空隙有風射掘者當之病

暄曰此與潮下氣毒同為一類今葬家及

修築動土犯之或病或死亦此故耳惟常治者乃不畏

水能駐顏 龍魚河圖曰北海玄洲有玄澗水如蜜味服之長生亞墨利加女子島旁有島出異泉以日未出時汲之浴面百遭老者復如童子綠珠井在廣西博白

縣雙角山下生女汲此水洗之則艷臨川銅山二泉一

沸一寒五峰山下者能潤人顏

中通曰水煖者潤顏  
長生洗艷溢語耳

水益氣已疾 金門記云端午午時有雨急伐竹竿中

必有神水漚取化痰定驚可以起死此猶八月取露研

砂以墨點之曰天灸也集元方用秋後霜治瘡呂氏書

以乾薑于霜時使受之梅雨水滅癰入醬易熟而不可

造酒醋扁鵲飲上池即半天河水也雨也令網目必以

樹白中水當之乎其以治瘟正取其意華佗傳以冷水

灌八十氣乃蒸出噐噐乃火溫牀卧而冷汗出粉搯之  
遂愈徐嗣伯以冷水澆房伯玉百斛背上彭彭有氣蓋  
火鬱則發發不極不反冬月平旦陽氣在內故冷極則  
發熱徐顯載葛乾孫可久治一傷寒不得汗發狂循河  
走可久猝置水中良久出之裹以重氈得汗解亦此法  
也人不能用此法者未詳其理耳邊外熱夷每病則牽  
入水邊以桶水潑之即此意

治水開支河 徐有貞張秋治水或謂當濬一大溝或

謂多開支河乃以一甕竅方寸者一又以一甕竅之方

分者十並實水發竅竅十者先竭

暄曰方寸一當方分百十先竭利于大溝

十餘倍矣

水激成瀑法 唐書拂菻當暑激水上屋溜簷取涼李

文達公賜遊西苑記西南小山殿倚之有洞洞上石巖

橫列密孔泉出迸流而下曰水簾其淙散激射飛薄濺

灑最為可玩周密言乾淳中納涼在翠寒堂層巒寒瀑

飛空下注大池皆激引者艾儒畧言多勒多城在山上

作一器盤水直至山城延平有水老為一城人視水入

廚管朽頻易開則水至塞則水止

崇禎壬午召大臣內苑蔣八公記涵碧亭

傍激水為水碓

過漩法

水之流緩則直急則曲韋莊峽程記言急流

有湏有漩緩棹隨漩乃得出不與水爭爭則舟埋水矣  
佛經有云海中漩者謂之漩復海傍人云用蘆蓆稿鋪  
之物投漩漩即緩可出若歸壚大漩寬數百里者或云  
不可聞聲聞聲則舩不可救外紀諳尼利亞有海窖潮

盛時窖吸其水而永不盈潮退即噴水如山高當吸水時人立其側衣一沾水人即被吸蘇州崑山有商洋潭亦漩也舟忌過此

安水土法 漢志敘土著雖言習俗實闢風土人移地久亦自變不自知也古方適他方水土不服以履底土水服之然在兩廣地濕多蛇惟吞豆腐便北都燒煤初至者亦豆腐解之東壁土大路土黃土冬灰治療各別天河水東流水逆流水山泉井花屋雷行潦其性迥異

或取日蒸或取火治平村不得急流則用甘瀾千揚可也二十四節水味隨變此气候相感又非疆域之限地洩冬收地洩以柔鐵入之煨可截玉地洩者溝水面如油或作金色如銹水之類是也

水寶 弘治中回回入貢見山間居民汲處必買此泉民不信猥云數十金即予之其令聞之猥云三千金守曰五千金亦願納也乃破山得一石泉源出于其中日數萬戶俱可給足名曰水寶

中履曰山陝少水處富家作水櫃數十里販水或園

城乾若得

此為寶

已疾諸土 張茂先曰三尺以上曰糞三尺以下曰土

錢乙以黃土愈皇子之癰癰張銳以黃土下吳少師之  
蟲疾治內熱解藥毒惟煮黃土為至便東壁土和胡粉  
治耳瘡唇瘡同礬治心痛醋調治湯火瘡孫思邈以刀  
畫地取土治蠅蝮溺瘡撲死者以蒸熟土熨之身面印  
文醋調赤土刺破塗之萬畢云東行馬蹄土以三家井  
水和之著卧人臍上令卧不知起南方沙土不效也然

無事服之土滯腸澁不可不知

土化物 錫入土即爛水晶埋之亦化為水香油鬻盛入土出之點燈無光有神其說撮灰土治百病但分各種湯下之以土能化物也

地游地動也 尚書考靈曜地有四游冬至地上北而西三萬里夏至地下南而東三萬里春秋二分則其中矣賓退錄言地恒動不止如人在舟坐舟行而人不覺

中通曰穆先生亦有地游之說地中多空氣行其中各方小動亦常事也重則地陷山移每思張平子作銅龍

地儀以應地動不知何理暄曰地震屬陽氣銅為陽氣所生故相感銅山崩洛鐘應其驗也八方分之各從來

處先

應耳

地中多空 山之土石生日剝人不見也石之上拔

者下有根根必中有空如石山多洞閩將樂浙金華粵

七星巖皆是也息壤墳起亦地中火氣騰湧地震者內

浮動也地陷者由先奔起而後陷也弘治辛酉元日地

震如雷蓋火氣激行于土中也

暄曰移石飛山皆以先有空隙氣乃得負之而

趨

西北與東南之土異 凡西北之土掘而復之盈故坎  
東南之土掘而復之必益土始足北方立土人多穴處  
可知其堅立土不可稻為其不停水也橫土為宜

洛無冰 宋神宗問陸農師洛何以不凍對曰聞有礬

石容齋曰凡溫泉下言有硃砂礬礬硫黃數種

詳見溫泉條

雪雹冰霜皆陰氣之所結而不成冰者陰不純陰也硫  
礬等物皆陽氣常行遇水而結者也陽結故陰不結

作冰法 萬畢術有凝水石作冰法陳眉公言以水晶

金匱要略卷之八  
煮水入井得冰智按其理不必凝水石與水晶也凡瓶  
水煮之極沸即墜入井底則六月亦能成冰冰在暑時  
以厚絮裹之雖置日不化惟見風始化

冰透碗外 凡水不能透碗外惟盛冰則碗外有細潤  
金山中冷泉能透錫器積寒之氣也以熱湯置漆案上  
其下亦潤以火爐置書冊上其書冊乾而書冊之貼案  
者亦有氣潤津津然此亦積熱之氣可類推也

鍼化雪剖冰 以鍼插地雪時遍滿而此處獨化試臘

胸臍亦然臍以煖故雪化鍼何煖耶鍼滑而下耶北方大雪則不驗冰非鍼不剖以文官菓汁塗刀可切片一云以薄餅裹冰刀亦可切

暑極生涼法 以冰置手心則舉體皆寒弱人則心戰故暑中有足心蹋冷成傷寒者亦係人之強弱虛實也  
中履曰盛熱時以冰溼兩乳上扇之則颯颯涼風沁然入腹大快

冰異 松江楊扇湖地煖不成冰卧子言萬厯三十年冬大風瞰之若漫天雪多紅燈蠕蠕旦視之則冰山也

高五大許又武宗時霸州文安縣一夕大風河水忽然  
僵立高起者二丈餘凍成冰柱中多空隙濶數尺以至  
于數十丈者沿河七十八里皆然亡何流寇至男婦數  
十萬盡匿其中竟以免難

暄曰陰氣攝起而陰氣結之  
此恒理耳然陽為陰迫則死

故地暖燈紅風甚而結此與沸瓶入井盛夏電飛同為  
一類可互推中德曰獼猴入云蘭州黃河結冰以夜其  
開也亦  
以夜

風土 馮時可言滇中裘葛可無備一雨便秋夜則擁  
綿惟永昌臨安夏間差熱耳然無日無風春尤顛狂凡

風皆西南風若東南風即媒雨大約正月半後至四月  
多風舊志曰雨師好黔風伯好滇冬日不短翌後至二  
十夜月猶圓滿偽唐張暨紀賈黃中談錄曰夾河風性  
寒故民多傷風河洛東地鹹水性冷故食麥而無熱疾  
滑臺風寒冷士民啗附子如芋栗愚者曰市上水溫淡  
山水寒而深山亦有水性熱者中履曰如杉關壽昌水熱北方固寒  
凡山之陽猶溫閩越冬溫而徐渤記元庚寅大雪荔枝  
盡死敦公言緬甸近海甚熱交趾六月正午時熱夜間

極涼衣服如中國非所謂披髮而以全幅圍身者也馬  
觀瀛涯勝覽曰葛蘭國諺云半年有雨半年晴七月小  
霽八月望後大晴三月又雨周達觀真臘記曰四時常  
如五六月不識霜雪半年有雨半年絕無九月每日下  
雨午後方下猶此方之延山暴也外紀印弟亞有加得  
山中分南北其南半自立夏以至秋分無日不雨反是  
則片雲不合酷暑難堪惟日有涼風解之其風自己至  
申從海西來自亥至寅從陸東來草木異者不可勝數

海惟太平海淺亘古今無大風浪大西洋海極深從大  
西洋至大明海四十五度以南其風常有定候至四十  
五度以北風則變亂倏忽更二十四向小西洋海潮極  
高大至大浪山風浪甚險滿刺加則無風而倏起里許  
之波獨利未亞海近赤道下常苦無風天氣酷熱食物  
俱壞諸海無冰北海則冰而堆成冰山矣哥阿之地無  
雨常晴至三十六年德墨多則多雨北海雨少夏月有  
雨濕土而止則遠日風高也泥入多國無雨亦無雲氣

但有泥祿河一年一漲亞大臘山之頂終古晴明無風  
蓋其地獨高而風微不覺也雲雨皆在其下耳

海市山市 泰山之市因霧而成或月一見嘗于霧中  
見城闕旌旗絃吹之聲最為奇海市或以為蜃氣非也  
張瑤星曰登州鎮城署後太平樓其下即海也樓前對  
數島海市之起必由于此每春秋之際天氣微陰則見  
頃刻變幻鹿徵親見之島下先湧白氣狀如奔潮河亭  
水榭應目而具可百餘間文牕雕闌無相類者又一次

則中島化為蓮座左島立杆縣幡右島化為平臺稍馬  
三島連為城堞而幡為赤幟睢陽袁可立為撫軍時飲  
樓上忽艨艟數十揚帆來各立介士甲光曜日朱旆蔽  
天相顧錯愕急罷酒料理城守而船將抵岸忽然不見  
乃知是海市遯齋閒覽曰湘潭方廣寺四月朔日在東  
壁則照見維揚官府樓堞民舍影著壁上張邦基言在  
四明舶局時王璵粹昭往昌國普陀山禱雨言洞甚深  
但聞水聲上復有洞穴日光所射可見數十步菩薩現

像于此中余密禱之見碧玉闌楯又現紋如珊瑚于深處見菩薩像下身僧言番賈來施而禱或見淨瓶或見瓔珞或見橋梁或無所覩粹昭平生倔强至是頗信安山笑曰又弱一箇馬林景熙蚤說曰漢志載海旁蜃氣象樓臺初未信也避寇海濱僮報海中忽湧數山予登聚遠樓見奇峰疊巘城郭臺榭中有浮圖老子宮詭異千狀近晡而滅筆談所紀往往類此噫秦之阿房楚之章華魏之銅雀陳之臨春結綺突兀凌雲者何限運去

代遷蕩為焦土浮埃是亦蜃也

暄曰氣映而物見霧氣白湧即水氣上升也水

能照物故其氣清明上升者亦能照物氣變幻則所照之形亦變幻暄邑近南關內有一小池一日近晡見有一騎倒影西岸水中北馳而過此所謂空中一大鏡水溫憲隙則轉映之小鏡也地上人物空中無時不有特氣聚則顯耳故不論山海都地悉得見之 中通曰空氣之攝影自下而上池水之攝影自上而下故影皆倒山海之氣橫攝市影故影皆順暄曰倒影者轉攝則順

陽燄水影早浪

燕趙齊魯之郊春夏間野望曠遠處

如江河白水盪漾近之則復不見土人稱為陽燄蓋真火之氣望日上騰而為濕潤之水土所鬱留搖颺重蒸

故遠見其動莽蒼之色得氣而凝厚故又見其一片浩然如江河之流也地出硝山出硫皆屬火化硫瀉之原冬寒生醱其理亦同若江南沮淖則但見蒼莽不見陽燄而硝與硫與醱皆不自此產矣晉符堅載記曰建元十七年長安有水影遠觀若水視地則見人至則止亦謂之地鏡陸友仁曰宋寶祐六年四月常州晉陵之黃泥岸亦有此異相傳呼為旱浪愚者曰日中野馬飛星燭然者陽燄之端也奇者為水影旱浪實則凡光生燄

燄自屬陽凡光似鏡鏡能吸影光與光吸常見他處之影于此處雲分衢路日射回薄其气平者為陽燄旱浪其气厚者為山市海市矣

暄曰乙酉十月嘗晨登高山見之凡四望山腰以下悉為

白浪所浸莽若江河久之乃隱兆克曰高山鋪雲海常也旱浪乃是白气

脂流 北史屈茨川在龜茲國西北大山中水如膏流出成川行數里入地狀如餽餉甚臭人齒髮落服之再生癘人服之亦愈水經注高奴洧水肥可然夢溪筆談曰鄜延出石油即高奴縣脂水也生于水際沙石與泉

水相襍惘惘而出土人以雉尾裹之可採入缶中張華  
言延壽縣南山有溝脂始黃後黑謂之石漆方鎮編年  
錄謂之地脂時珍以為石腦油一曰硫黃油今雲南緬  
甸廣之南雄皆有之高麗有火油臨邛有井油外紀  
斯大山亭露有泉如脂膏人取燃燈或作油漆用凡井  
油火以水澆之愈熾以地灰撲之則滅

中德曰王烈得  
石髓以與嵇叔

夜成青石亦此類乎信坑水可接  
骨繡水可以淬刀皆水之有脂者

暖谷溫泉地中陽氣所結分砂硫礬礬未確也 山海

經道州有煖谷江浦志秦少游述天下溫泉十三處陸  
友仁言匡廬汝水尉氏駱谷驪山和州之惠濟渝州之  
陳氏山居為最述征記曰東萊郡出溫泉恒沸烏墜輒  
爛安成紀云宜陽鄉出溫泉耒陽縣出溫泉博物志云  
不周雲川之水温如湯梁州記云漢水南有溫泉周圍  
數千步冬夏常沸可熟雞子未至二十里便望見白氣  
衝天袁山松宜都山川記曰銀山縣溫泉夏纔煖冬大  
熱上常有霧氣浴病即愈零陵縣記云溫泉中有伏石

分流其陰寒其陽沸劉義慶幽明錄曰艾縣輔山有溫  
冷二泉熱煮雞豚冷若冰雪流數丈而合又汜水北合  
婁山鄆水之溫泉至冬則煖瀧水合雲水處有湯泉投  
腥即熟有細赤魚游之即始興記之溫泉赤魚也沮陽  
城大翻小翻山有溫湯下足便爛不得言言則愈熱南  
陽宛縣有紫山湯谷魯陽縣大和川合溫泉水湯側有  
石銘曰皇女湯武周縣有黃水合火山水有火井火鼠  
火井之旁有溫井魏土地記曰代桑乾城水北有溫湯

療疾下洛城橋山下有溫泉湏水逕新城會温水熱可  
煇雞魚腹之鹽水與溫泉對注汝寧商山有溫泉南康  
郡志遠公硃砂泉詩曰一峯高拂白雲邊下有硃砂如  
火燃已是氣蒸千里煖如何澗石榴溫泉即周景式所  
云主簿山之溫也在黃龍山北麓有二池張渤吳錄曰  
丹陽江乘縣湯泉六處禽魚立爛而煮豆穀終日不熟  
筆乘亦載之升菴言雲南溫泉甚多而安寧無硫磺氣  
後周王有銘曰白礬上徹丹砂下沉可知溫泉以丹砂

為上胡仔漁隱叢話取黃山硃砂泉春微紅可茗驪山  
是礬泉郭青螺豫章詩話言福州之溫泉以溫田膏稻  
廬陵太興新田二溫泉分寧最熱毛竹山泉則溫臨川  
銅山二泉一沸一寒五峯山下者能潤人顏今北京西  
山畫眉溫泉大小湯凡三而遵化縣北之溫即古稱徐  
無城東之溫戚繼光甃之薊馬蘭峪溫泉最甘馨天寧  
四溫北其一耳和州二溫一無硫氣智按即陸友仁所  
云惠濟泉也敝鄉溫泉出于石穴天下處處有之不能

悉記先儒曰地中陽氣遇濕而結為硫雷火亦有硫氣  
陽氣也唐子西取硫置水水不溫以此駁之熊三拔謂  
別無硃砂礬礬之別金尼閣曰西國有七十餘湯各標  
主治布那姑山皆硫不聞泉湯也蓋陰質陽氣為湯陽  
質陰氣為燄為涼湯泉以貯器還涼湯泉冷泉各煮沸  
必同時晉長明燈色青不熱質存氣易此其徵矣暄曰溫泉療冷  
與硫同治其不作硫氣者有所隔別如重湯煮物也然  
陽遇水而死為硫水遇陽而死為礬水火相切互有所  
變故礬可收硫毒中通曰陽氣聚而過或出溫泉或  
結硫或為火井非硫來溫泉也凡硫礬礬皆陽氣為溫

閔于土者舉此與銅非相因礪則最烈于爛物惟硫專顯其熱耳硃砂與溫泉無與

醴泉甘露有數說本以甘而立名也 九成宮醴泉銘

魏徵撰歐陽詢書開皇時以杖導之有泉湧出因名醴泉彥遠跋曰漢儒言地出醴泉天降甘露為瑞則列子神瀆之類也爾雅曰甘露時降萬物以嘉謂之醴泉智按爾雅作甘雨時降則以時雨為醴泉禹本紀言崑崙有醴泉法苑珠林言泰山東有醴泉亦非含文嘉中候所謂之醴泉也九成宮之泉猶山谷之題新喻醴泉耳

王仲任論衡因爾雅醴泉為甘雨並疑景星非著天之  
大星得毋以上文景風為景星乎山海經沃搖山民飲  
甘露呂覽言三危揭雲之露拾遺言崑崙甘露如丹一  
統志雅州蒙山有甘露其凝如脂其甘如飴曰日膏天  
油神漿言瑞應者名之也度爾格國樹如橡栗夜露凝  
為蜜食之極甘杜鎬云甘露非瑞也草木將枯精華頓  
發謂之雀錫建康實錄陳末覆舟山蔣山松柏林冬日  
嘗出木醴後主以為甘露果瑞耶王鞏曰周章仲元宰

衡陽甘露降松竹如珠取一枝示貢父貢父曰雀餉也  
飲之令人疾都尉高懿廳槐有甘露鄭敬曰但樹汁耳  
智按此厭瑞之說也不礙為藥本草甘露服之潤五臟  
大食國收露暴成甘露蜜

沙異 燉煌城南有沙邱城太古時常自鳴一名神沙  
山其沙色黃沙下有泉曰沙井人登岸聞鼓角之聲劉  
敬叔則云涼州沙邱覆師積尸後有鼓角聲販玉璞者  
言其沙可以碾玉塞外多沙謂之沙漠有流沙沙逐水

流沈存中言有陷河一失足人馬俱陷望日落起暈則  
難行一曰沙海行者驅駝先行以駝微知其處也遼陽  
有沙泉泉湧出其沙可磨寶石度爾格國有沙海沙乘  
大風如浪行旅過之常為所壓太西漏沙色白小圜如  
一故以之代刻漏杉關以北細沙皆方稜而帶金晃之  
色金幼攷北征記封王佗號鳳凰山有沙城海子沙中  
穴即鼯鼠穴沙有黃如金白如玉又有青黑者全邊記  
曰邊牆難修忽然沙起則沙與城平北方十日之內必

有一風名黃沙天甚者晝晦北方風高地燥沙塵易起  
不似南方澤多地潤者也鄧左之曰章門飛沙迴抱如  
堤隔宿坎之明日復滿偶有下者已復故處雩都固石  
之沙圖相傳異之則異矣愚者曰知其故則常矣

歐陽宗衡

曰固石距雩都百餘里溪中有洲寬廠里許周匝皆水石  
山屏之中皆白沙平鋪光潤如砌玉欲見圖者隔宿禱  
之其出也鳥跡魚文卦例飛符蜃閣海市枯木寒鴉無  
不畢具錯綜變化前後見者各出機軸無有重複其來  
無首其去無尾幻哉 暄曰此如河凍瓦凌恒有魚龍  
獅鳳及花草之形皆風力所成者世有其象即有其氣  
有其氣即可以緣物而顯 中德曰  
全邊略記是先祖賜環職方時所編

立土橫土各有崖文 河北多立土人鑿洞以居其崖  
上有紋者削之而紋如故也平陽府候馬驛澮河兩岸  
石土上皆手跡或掌或拳若印削去之其中復然薛文  
清公以崖層紋為陰陽之摩盪陸子淵曰實是水所漾  
耳虛舟子曰大同山中有人骨在山腰上下五六十丈  
皆石惟中一帶四五丈高皆髑髏脰節齷齪然關中山  
亦有之豈上古之水所漾耶何人骨能久留至此耶如  
武夷之仙峴豈似之而非耶蓋土石自然有文有色故

各有肖猶冰凌之成花鳥形也

渾河鹵地有宜 寧夏漢唐渠利支溝用板壅泥而水  
過之鹵泄板下故稻比江南上谷渾河入畿柳慶亦有  
渾河禹力溝洫正所以收泄也北塞風勁紫土童然惟  
夏月發生除松柏外秋即凋矣故種植與南異梁稷稽  
稻其宜耳粵近海田溜泥不用犁耙冬春乘桴播種稻  
高秋剪剪後潮大來沃草乃燒淋以煎鹽

杜粵人記黃  
山下浮田泥

上水浮土乘板  
播種與葑田異

占候類

占幾 易四道以尚占終受命如嚮精攝神變至誠神明  
明醅酢佑之非情識妄想之所能及也遠公曰易以感  
為體故無體不因乎幾無可言矣平素窮盡至理臨時  
觸幾而應之鏡聽筌筭其為無心之符一也嚴君平闢  
子明蓋深得聖人尚占之情者乎揚邵張燧本以明其  
故而應幾因之人心自靈蔽于欲忿因二以明失得之  
報凡民十皆得五何況通神明類萬物者詎定以管郭

驚奇耶三式卦影莫不本此以術造賊有之故聖人藏

諸易而不瀆告也

中履曰不以通幾混質測詎以質測廢通幾乎兩間之象無非類應配幾

也幽明之感無非常變順逆也人事天道果二乎哉聖人引觸不可思議自非神明難信及此

藏智于物 說卦傳類萬物于八卦悟此幾乎禮運本

天殺地舉五十二之相旋悟此幾乎以天盤加地盤

而生克制化隨變應節易軌三式皆有經緯宇宙焉常

運經也占以人歷其位者緯也焦熱沍寒視歷此者何

人耳愚者嘗言以推移之宙消貪心以規矩之宇辨物

則而萬念俱可畢矣去者已去來者未來今又逝也貪  
執何為達人樂此而荒狂又竊之故必明六合五破之  
宇處處皆然乃知物之則即天之則即心之則也管子  
曰宙合謂宙合宇也灼然宙輪于宇則宇中有宙宙中  
有宇春夏秋冬之旋輪即列于五方之旁羅盤而析幾  
類應孰能逃哉聖人不惡賸動藏智于物故圖書象數  
舉其端幾而衍易以前民用損益盈虛推行變化在其  
中矣要不離乎統類配應之時位也人人本具愚夫取

識猶且不爽况齋戒至誠而叩神明靜正之士乎故曰

至誠如神

中通曰宙輪宇中此真破天荒之一決也心本不自知其心愈窮愈幻而心所造之事心

所見之物森然不紊也自非格物之比量豈享物格之現量哉消心之言止貴平心平乃虛虛乃明乃能燭物之理而不被物惑亦不為談物者所惑亦不為掃物者所惑果然不惑則因物付物之本空也卦氣太元洞極元色皇極潛虛蔡疇以至太乙用十六象正三推八八皆衍數之節度而理自冥應者也

貞悔 章俊卿曰貞悔自箕子發之朱子以始終主客

近遠言按秦伯得蠱曰貞風悔山是以内外卦言重耳

筮貞屯悔豫則以本卦之卦言蓋屯蒙顛對屯鼎望對

皆互為正變也陸龜蒙曰季札以樂卜趙孟以詩卜襄  
仲歸父以言卜游夏以威儀卜故占者精誠而已潛老  
夫曰因二濟民貞勝在中觀玩何所非占然三兆八筮  
正所以一其心也

中通曰凡兩端皆貞悔皆消息也世  
應飛伏無非此幾而貞勝則一也

觸幾惟變所適

左傳諸占多言之卦岐疑決于目擊

此不可言傳也虞翻為權筮取荊州得節五曰不出二  
日程迺筮蠱曰四則有獲變兌毀斷乾首當殺完顏亮  
虛舟子為劉盾平筮姤三曰殿元也觸臂无耳崇禎庚

辰石叅先生與老父占益三曰必赦而我不與果因悼  
靈王大赦而黃公先移北司矣卜年如周其厄如夏謹  
識于此

以數表幾而像亦類之 緯書以斗占物以天綱類應  
也熒惑主童謠非識而何王達曰風雷在天無形以乾  
位戌亥肖屬配之故風像犬雷像豕雨坎像男電巽像  
女古之鹵簿神旗皆繪畫云元虞裕談撰曰東方氣雷  
南氣電西氣虹北氣雲雨雪電中央氣露皆配位也夢

曜入懷生子大貴何異熊蛇詩分牀瓦日符畫氏房月  
符畫昴畢則氏房間有日星昴畢間有月星東西照也  
相人形骨內經見端矣精者相其神晁氏曰小運本說  
文空亡本史記李虛中言呂才稱本季主而復譏勾絞  
祿馬文山言五十一萬八千四百畢矣一日止生十二  
人耶十一曜出文殊經薛儀甫言以最高占土木同度  
為限亦以推命愚謂黃帝運氣五六交輪即是易圖而  
叢辰日苑因之觸其類應一瓦一石皆以機示子曰心

之精神是謂聖

雨占 黃子發相雨書曰以戊申日候日欲入時日上  
有冠雲不論大小四方黑者大雨青者小雨北斗中有  
雲後五日雨河中有雲三枚相連三日大雨六甲日四  
方雲皆合者即雨躍魚雲遊疾者雨諺云雷多于戊己  
丙丁日下趙雲州云凡遇戊午己未日天必變雨或亢  
壁宿直日可免吳諺正月建三亥湖田變成海陸泳吳  
下田家志曰初三月下橫初四暗盤有月交二十五

日有雨則主久雨三月三日聽蝦蟆叫驗湖水之高下  
今俗皆倡神以視所止為驗謂之打水又諺曰春雨甲  
子乘船入市夏雨甲子赤地千里秋雨甲子禾頭生耳  
冬雨甲子飛雪千里又云戊午元同甲子期始終七日  
最稀竒七日多晴兩月燥七日多雨兩月泥甲申雨主  
米暴貴春主五谷不收夏主傷田禾秋主六畜死冬主  
人多病方言云甲申猶自可乙酉怕殺人又壬子雨則  
久陰又云甲子豐年丙子旱戊子蝗蟲庚子亂若逢壬

子水滔滔俱在正月上旬看不怕正月二十陰只怕二  
十一日晴三月三日晴桑葉挂銀瓶六月初三晴山篠  
盡枯零四月十六烏漉漉不論高低一齊熟四月廿八  
小分龍是日當雨惡乾風六月西風吹遍草八月無風  
秕子稻重陽無雨一冬晴立冬之日猶分明雷內露在  
十月裏來年五月內有水久晴視戊已久雨視丙子夏  
壬子雨牛食多腐雨下六壬頭低田可便休愚者曰此  
數者與壬子水日占雨者同豈有一日九州皆同下雨

之理青田以此日望氣占之氣在天然去地近移數十  
百里即變其法分五色五行之形以黎明從高處望之  
與日辰相生或相解論理隔日陰晴于日出入前察之  
最驗大率春夏定驗秋冬應稍遲田家五行以多積而  
驗之風雨故自有候其以甲子言者理不出于盈虛而  
觸其端幾耳所謂驗者但十得五耳邵子曰聖人知九  
餘三凡人知三闕九

暄曰以各方之土地雲物驗雨暘  
者十應七八以各方之時令晦朔

驗雨暘者十應二三以干支合者不應也中通曰風

角詳後漢李尋郎顗傳後實本黃帝八風也介葛盧公

治長管輅皆能鳥占此與干支諸例同一觸幾惟相人堪輿望氣猶屬質測也黑室辨線望氣乃驗觸幾以誠而平時窮理

斷非苟然

南北方雨暘之異 南方近日之度火土之氣時為太

陽暴照如人身熱則汗液也北方遠日又春夏多風致

火土之氣疏越故雨恒少閏中春月恒雨夏月日出則

酷暑旋復有雨如滿刺伽國處赤道下四時皆裸賴日

日有雨以解蘊隆可見暘為雨之根也

互詳風土  
條雨微條

歲候 越絕書計倪對越王曰太陰三歲處金則穰三

歲處水則毀三歲處木則康三歲處火則旱糴有時斂則決萬物不過三歲而發矣天下六歲一穰六歲一康凡十二歲一饑從寅至未陽也陰且盡之歲收五穀以應陽之至也陽且盡之歲發糴以收野宅牛馬棺木以應陰之至也此皆十倍次五倍甲貨之戶槩乙貨泰丙貨赤豆丁貨稻戊貨麥己貨大豆庚貨穰辛貨菓壬癸無貨由此觀之其歲候之所自始乎要亦盈虛消息之槩也潛草曰四立分至占風方雨候雲氣此中節之幾

乎量日月影非矣雄雷早雌雷水亦以初幾言之東風

生蟲西風殺蟲

稱自發科揚花後忌東風若南與西不忌也夏至後十日內有一日北風則蟲

盡去然遲稻又惡北風諺曰禾畏東風麥畏西棉花畏北

栽忌東風釀厭東風寒則

物堅也芋喜東風芋毒不擇也美草則嬌

春西風無雨東則雨夏北

風乃雨夏發東風秋間生蟲

清明喜晴芒種宜遲雨八月朔雨角田

下熟九月朔起占來年穀南風米貴重九尤關十月霧

曰沫露相去二百五日水至冬至囊諸種窖之五十日

取驗多寡則知來歲所宜此氣幾也

中元雨曰翹遠除夕元旦迄拜水猶

冬至土徵諸物者梅少實則稊少杏花多則宜豆穀雨

雨則多魚上已則占蛙聲鵲鵲主水檀葉定候鳳仙芒種前花

野薇立夏前花藕夏至前花簞透林鰾脊骨曲皆主水頽諺曰黃鵲口禁蕎麥斗

夏中候黃鵲不鳴則蕎麥可廣種也六月六日雨主蟲清晨雨蟲生園畦上午雨蟲生田下

午雨蟲生山薜荔果羸劈開滿者年豐東坡曰益智候禾南海

產益智花實皆長穗而分三節觀其上中下節以候早中晚之豐凶鄭所南曰瓊花占歲

猶之師曠以先生占草也薺先生豐葶蘆苦水藻惡疾藜則早父則病達則流灾

山愚者曰自杜臺卿廣月令而察物變紀種采者二十

四氣咸列程品要而言之分至八節舉其槩耳實以物

性之陰陽應地上之寒暑以太陽緯度為進退也

中通日冬

春種植二分移接清明浸稻種白露後種麥菜此八節  
之準也如元日浴蠶連取柏露二月初三蟬蛻出海清明後  
鴨卵勿過清明傳胎蟹譜二月初三蟬蛻出海清明後  
種薑社日治果木驚蟄禁蟻上庚納鯉鯢上己造麴母  
采何首烏煉松脂寒食留飯懸乾四月采訖胡狝蒼夏  
枯烏頭烏賊過小滿小青梅過小滿黃蠶過小滿無絲  
葵過小滿則長芒種栽槐揀榴杉端午收竹神水桃柏  
葉練葛紅花術取鷄腦豕首血和雄黃夏至取螻蛄皮  
至者三伏造醬餌硫曝瓜菜種六月六儲水七夕采萍  
收角蒿八月脫果包鵲膝采大黃九日占風製朮種蒿  
粟或曰中秋午種乃生霜後取漆采桑葉金櫻凡藥以  
秋收者多十月重椒種麥者十一月種桑取熊膽冬至

芥生苗種附子十二月伐木不蛀四月七月亦可臘雪  
應百二十日之雨不特凍土殺蛭也嶺南以霜多亦占  
來豐臘收棟汁挿柳据此但隨節紀之亦可前  
後地視日度雨暘最切耳壬丙定梅豈足拘乎



物理小識卷二

欽定四庫全書

子部

物理小識卷三

詳校官庶吉士

臣汪彥博

員外郎

臣牛稔文覆勘

覆校官編修

臣汪鏞

校對官中書

臣金光悌

謄錄監生

臣黃廷璧

欽定四庫全書

物理小識卷三

明 方以智 撰

人身類

鼻祖 朱隱老曰人寐則目不用次耳不用鼻息則晝  
夜寤寐不息者也浮山愚者曰始生鼻與命門為小環  
漸長而成任督之環故鼻獨直而有二孔自為代錯也  
十二經十五絡三隧八奇總應呼吸如草木之根葉時  
時上下歸塘崑頂貫輸環輪而無一息或間者也平日

寸口百脈會焉習莫察矣聖人以亥巳之晝夜知子午之晝夜而與百姓同用卯酉之晝夜帝出乎震吾得夏時誰並悟乎息者消息休息自心生死之幾也心息相依以入深深通晝夜而知則遊即太息也黃石齋先生疑萬三千五百息與易策不合老父十五年得之蓋九洛之度符也六十四日大周者也槩也中有盈虛

三隧 任督旋者宗氣也陰行脈者榮也陽行分肉之際者衛也一呼行三寸吸如之五為常六為閏行陽周

諸腑行陰周諸臟各二十五度與五十度周脈相合而會於寅行八百十丈循環無息者也馬蒔謂呼三吸一八會之氣會於膻中行于上焦謂之宗氣榮言運也由中焦生太陰主內衛言維也由下焦生太陽主外呼出心肺吸入腎肝總言之也中通曰言出氣海有出無入而口受飲食胃氣亦長者也鼻吸上腦而胃中應之三隧之脈自應之記此以問神明者

二路 上下通止二路前則通于臟而藏精後則通于腑而輸泄口二竅前曰喉肺管也會厭司開以言司閉

以食肺下連心心系腎肝肺此五臟滿而不實者也後  
曰咽食管也胃脘為賁門入胃從幽門循小腸關門接  
大腸及直腸出魄門此六腑實而不滿者也小腸泌別  
清濁關門旁為膀胱達前陰上管其下管即腎系也愚  
者曰口二竅上有鼻孔下二竅前後洩而前復有二竅  
也精屬腎而曰五臟藏精臟不洩而獨腎泄蓋小心焦  
火泄之也故曰口之合臟腑者脾胃也味養氣而言吐  
納也宗筋之合臟腑者腎精小心焦火藏用者也目之

合臟腑者神于明也色通內外而心直受之幾也耳之  
合臟腑者神于暗也聲通內外而心旁受之幾也口出  
耳入言以風力鼻獨識氣上腦為近也脣以表脾而四  
肢合肝皮毛合肺骨則腎主之矣臟與臟交者心肺以  
在上也腑與腑合者胃大小腸在中傳受也臟腑相合  
者肝膽脾胃之司左右也腎與膀胱則形不相通而氣  
相屬者也此不可以不知

中德曰膀胱無上竅似絛紙之透汞焉有下竅而聽氣之

收放經曰氣化則能出矣故肺氣無病則開門泌別依  
時中履曰鼻之于目山澤通氣口之于耳雷風相薄

三部九候 兩額動脈太陽所行以候頭角氣上部天  
也兩頰動脈鼻孔兩旁近巨髃陽明所行以候口齒上  
部地也耳前動脈陷中少陽所行以候耳目之氣上部  
人也手太陽經渠以候肺中部天也手陽明大腸合骨  
以候胃中之氣中部地也手少陰神門以候心中部人  
也毛際外羊矢下寸半陷中五里分臥取以候肝下部  
天也太谿以候腎下部地也魚腹上直五里下箕門分  
沉取以候脾跗上衝陽之分穴以候胃下部人也三而

三之合則為九九分九野為九藏神藏五形藏四也內經順三才以表舉其實人皆在中

十二動脈 太淵在寸手太陰肺也陽谿在手合骨上手陽明大腸也衝陽在跗足陽明胃也衝門在腹下前股溝縫足太陰脾也陰郤在神門內手少陰心也天窗在喉旁手太陽小腸也委中在臍宛足太陽膀胱也太谿在踝裏旁足少陰腎也勞宮在掌心手厥陰心包絡也和髆在耳與目之間手少陽三焦也懸鐘在外廉踝

之上足少陽膽也太衝在足大指上趺足厥陰肝也此以十二經循環言兩太陰肺脾兩陽明大腸胃是濕土燥金相代錯以化用也子隨母居土旺金盛故太陰為臟位與陽明隔而氣相合為腑也兩少陰心腎兩太陽小腸膀胱是君火寒水代錯以化用也火從水化水隨腎至故少陰為臟位與太陽隔而氣相合為腑也兩厥陰心包肝兩少陽三焦膽是風水相火代錯以化用也相火寄于肝腎膽者肝之腑心包者腎之配故厥陰為

臟位與少陽隔而氣相合為腑也一少陽二陽明三太陽一厥陰二少陰三太陰故少陽與厥陰陽明與少陰太陽與太陰相衝合也少陽中見厥陰合矣陽明與太陰合太陽與少陰合則峙合也陽明中見太陰言病生于溼土也厥陰中見少陽言病乃相火為之是從中也心腎小腸膀胱水火互根各隨見證而治是從本從標也少陽之病直治相火太陰之病直治溼土是從本也風從火斷則汗之燥與溼兼則下之燥通大腑溼利小

水皆下也肝膽三包心小皆火脾胃腎肺大腸皆溼十

二經有約幾焉張璠診手而復診趺陽太谿正謂三陽

以胃為主三陰以腎為主也

中履曰手足十二經循環六氣表裏別詳一圖是老

父獨悟者也

內經尺寸脈 尺外以候腎尺裏以候腹中附上左外

以候肝內以候鬲右外以候胃內以候脾上附上右外

以候肺內以候胃中左外以候心內以候膻中前以候

前後以候後上竟上者胃喉中事也下竟下者少腹腰

股膝脛足中事也微論曰外以候陽內以候陰腎肝胃  
肺心皆近背之陽故從外取腹鬲脾胸與臆中皆近腹  
之陰故從內取也大小腸皆在下焦腹中故候之尺裏  
樞要亦以左尺主小腸膀胱前陰之病右尺主大腸後  
陰之病今脈訣乃以大小腸候之上部限右尺候三焦  
謬矣然愚者又有說

六表裏脈法 尺寸六表裏出于難經故王叔和專于  
人迎寸口分三部九候倘經所謂引而伸之可千可萬

者乎寸難曰假令心脈急甚者肝邪于心也心脈微急者膽邪于小腸也豈非岐伯從其位越人脈經從其絡互徵巧取亦何悖焉

八奇經九道法 二維主一身之表裏以乾坤言也陽由外踝上行衛分陰由內踝上行榮分二蹻起跟中主一身左右之陰陽以東西言也足少陰太陽之別脈分內外踝會目內眥者也督循背任循腹衝夾臍以南北言也皆起于會陰而三焦命門與督任衝相通帶脈橫

束腰以六合言也起季脇足厥陰章門穴足少陰當十  
四椎屬帶陽維病寒熱陰維病心痛陽蹻之病陰緩陽  
急陰蹻之病陽緩陰急督病脊強而厥任病結疝瘕聚  
衝病逆氣裏急帶病腹滿腰寒傷寒傳以足經連奇經  
也李瀕湖以九道診尺寸其理微矣

李士材曰足六經已盡周身上下之

脈絡而手經已在其內

左右分司之徵 內經曰人迎者胃脈也麗安常因此  
辨人迎在喉天窗上然夾喉分左右何礙於兩手之分

左右乎舊曰氣口候內傷以五藏之氣必因胃氣而升肺也人迎候外感以肝屬風木外邪迎虛而入也先祖廷尉公曰岐伯云肝生于左肺藏于右肺太陰統氣肝厥陰統血也智按肝在前稍低而葉偏左肺在後最高而葉偏右人之元氣以火運資胃氣升肝入肺而降旋轉一身晝夜五十營肺朝百脈平旦會于寸口止此太淵肺氣耳因氣知血因浮沉上下知陰陽也臟之陰皆行手足之面腑之陽皆行手足之背脈在手足則左為

陽右為陰一陽膽三焦二陽大腸胃三陽小腸膀胱腑  
屬人迎一陰包絡肝二陰心腎三陰脾肺臟屬氣口故  
曰浮應皮毛者腑也沉應肌肉者臟也而心肺在上亦  
以浮應肝腎在下亦以沉應六脈皆和緩者脾胃也是  
謂平脈此豈可泥滑訣乎仲景曰寸以候氣尺以候血  
槩幾尤簡

人迎氣口謂關前非寸前  
外感于風內傷于食耳

命門中關而腎分左右 虞天民辨命門象門之中關  
何得分左為腎右為命門虞說是也然分左右配六表

裏亦出難經豈無故乎愚者曰天曜何故必旋乎旋則左升而右降矣岐伯曰上下有位左右有紀或南面視或北面視要之東升西降則一圜也腎本水而起與火俱其降也火歸于焦謂之腎則言真水謂之命門則專指真火也人身左為氣右為血兩寸口左人迎右氣口皆于不可分中而以幾析之在人會通詎容泥執

膽最旋動 內經曰十一臟取決于膽膽汁三合附肝滋養而與腎通故恐傷膽而即傷腎也氣無有不旋轉

者而膽之旋動尤速故墨家取猪膽化膠醫取熊膽通  
積真臘國王欲資以為勇則誤矣指甲為肝血之餘足  
以驗膽之大小心定則膽定以理勝之此一幾也

五臟  
不泄

而腎泄腑泄  
而膽不泄

心用小心 蘭臺秘典曰臚中臣使之官喜樂出焉合

為十二臟則配手厥陰之經不在臚中乎靈樞之敘經  
脈雖有包絡而無臚中然其曰動則喜笑不休正與喜  
樂出焉之句相合夫喜笑屬火之司則知其與心應也

獨臚中稱臣使者對君之名也愚者曰臚中者心主之宮城也又曰心包絡又曰小心此與命門相火同別安在岐伯曰鬲育之中上有父母七節之旁中有小心楊上善註太素曰背脊二十一節從下數第七節兩腎夾焉父母氣海也靈樞言十二原以心包絡大陵穴為心之原明真心不受邪故知手心主代君火也縣珠言刺大陵曰瀉相火小心之原也心不言俞是一徵也虛舟子曰心不用而用小心為主知之乎臚中氣海胃穴第

五正對心臟而稍前出耳故曰氣以火運君以相用焦  
起于下而衛行三段也由是決之三隧會于肺旦而周  
流無端臟腑加心包應三焦為十二是兼三而兩之也  
中五而交之也四其三而六爻表半焉兩端一貫猶不  
徵信耶

中通曰無形火寄心為君若滿  
空光藏命運焦為相若油焰也

運氣藏府同一交幾五六為中數參兩併為五參兩  
乘為六奇顯于偶故五運旋六氣而歷于支則十二約  
為六故六十而周蓋有天之運氣焉有地之運氣焉有

人之運氣焉各有常變參而決之仲淳直以為謬則未  
詳其通理矣五運篇云風寒在下燥熱在上溼氣在中  
火遊行其間寒暑六入故令虛而化生也可悟火溼兩  
者足統一切而五行尊火動靜歸風大氣舉之水土持  
載身心亦如是也腎水而真火出焉心火而真液生焉  
人身以陽氣為主故曰真陽統陰陽貞夫一者用相代  
錯約為五六參兩之幾誰能慧然獨悟哉

亢制 經曰亢則害承乃制王履曰造化不能無亢亦

不能無制五臟更相平也不平則所不平勝之五志相攝以情平情貴知其故因而自平矣不恒其德則所勝來復政恒其理則所勝同化程子常舉之精神皆氣也精足乃氣足而神足若言統理則神運精氣道歸靜正享其中節妄動固病距閉亦病調御之法可不知乎

血養筋連之故 主制羣徵曰人身溼熱而已熱恒消溼無以資養則膚焦而身燬矣故血者資養之料也血以行脈脈有總曰絡絡從肝出者二一上一下各漸分

小脈至細微凡內而臟腑外而膚肉無不貫串莫定其數脈之狀似機其順者因血勢而利導之科者留血毋退橫者送血使進也脈之力又能存血不令敗壞血合于痰乃克順流合于膽乃免凝凍合于體性之氣乃啓厥竅導之通無閉塞也從心出者亦有二大絡一上一下分細周身悉與肝絡同所不同者彼行血存血此專導引熱勢及生養氣之路耳心以呼吸進新氣退舊氣直合周身脈與之應少間不應輒生寒熱諸症醫者必

從三部躍動之勢揣知病源蓋以此也腦散動覺之氣厥用在筋第腦距身遠不及引筋以達百肢復得頸節脊髓連腦為一因徧及焉腦之皮分內外層內柔而外堅既以保存身氣又以肇始諸筋筋自腦出者六偶獨一偶踰頸至胸下垂胃口之前餘悉存項內導氣于五官或令之動或令之覺又從脊髓出筋三十偶各有細脈旁分無膚不及其與膚接處稍變似膚始緣以引氣入膚充滿周身無弗達矣筋之體韌其裏皮其表類于

腦以為腦與周身連結之要約即心與肝所發之脈絡亦肖其體因以傳本體之情于周身蓋心腦與肝三者體有定限必藉筋脈之勢乃克與身相維相貫以殫厥職不則七尺之軀彼三者何由榮之衛之使生養動覺各效靈哉愚者曰此論以肝心腦筋立論是靈素所未發故存以備引觸

論骨肉之概 銅人骨度以各人中指一節為寸兩乳間九寸半可驗然曰此衆人之骨度則出格者有矣主

制羣徵曰首骨自額連于腦其數八上額之骨十有二  
下則渾骨一焉齒三十有二脊三十有四胸之上有刀  
骨焉分為三肋之骨二十有四起于脊上十四環至胸  
前直接刀骨所以護存心肺也下十較短不合其前所  
以寬脾胃之居也指之骨大指二餘各三手與足各二  
十有奇諸骨各有本向或縱入如釘或斜迎如鋸或合  
筭如匱或環扼如攢種種不一總期體之固動之順而  
已論肉其數六百界有奇其形長短寬狹厚薄圓匾圭

角渾異其勢各上下相併或順或斜或橫或異此皆各有本用而順本身多異之動是其總向也凡各骨之向約有四十各肉約有十悉數之則數萬也以身之高言之六倍者廣十倍者厚比于肘四倍比于二足六倍比以手大指七十二倍連餘四指比之其倍也二十有四而舒兩肘比之縱與橫適等矣面之長連四指三量之下頰至鼻孔一鼻與額各一額至頂連四指二量之盡矣其廣也連四指四量之鼻左右至眼之角各一又至

兩耳亦各一耳弓上于眉下于脣其相去也適相等耳  
以內若骨腸筋脈及肉界其長短厚薄疎密堅柔無弗  
稱者

中通曰骨之節度經絡血脈之節度皆具律歷之  
幾有支有別有交有會若比例而條列之當有以

資神  
解者

身內三貴之論 熟以為生血以為養氣以為動覺其  
在身內心肝腦為貴而餘待命焉血所由成必賴食化  
食先歷齒刀次歷胃釜而粗細悉歸大絡矣細者可以  
升至肝腦成血粗者為滓于此之際存細分粗者脾包

收諸物害身之苦者膽吸藏未化者腎脾也膽也腎也  
雖皆成血之器然不如肝獨變結之更生體性之氣故  
肝貴也心則成內熱與生養之氣腦生細微動覺之氣  
故並貴也或問三貴之生氣如何曰肝以竅體內收半  
變之糧漸從本力全變為血而血之精分更變為血露  
所謂體性之氣也此氣最細能通百脈啓百竅引血周  
行遍體又本血一分由大絡入心先入右竅次移左竅  
漸至細微半變為露所謂生養之氣也是氣能引細血

周身以存原熱又此露一二分從大絡升入腦中又變而愈細愈精以為動覺之氣乃令五官四體動覺得其分矣浮山愚者曰人之智愚係腦之清濁古語云沐則心復心復則圖反以此推之蓋其有故太素脈法亦以清濁定人靈蠢而貴賤兼以骨應之

身中類表 古聖人之物物也類之而已靈樞經曰赤

色小理者心小粗理心大

五藏以色分

無髑髏者心高髑髏

小短舉者心下髑髏長者心下堅髑髏弱小以薄者心

脫髑髁直下不舉者心端正倚一方者偏傾也反膺陷  
喉者肺高合腋張脇者肺下好肩背者肺堅廣脅反骹  
者肝高合脇兔骹者肝下揭脣者脾高脣下縱者脾下  
高耳者腎高肺應皮皮厚者大腸厚心應脈小腸應之  
脾應肉肉腠堅大者胃厚肝應爪爪厚色黃者膽厚色  
黑多紋者膽結也腎應骨密理厚皮者三焦膀胱厚皮  
急無毫毛者三焦膀胱急聞之師曰形者精氣之所為  
也其槩如此然神寓于形神足以變其形故曰善自為

道者無為形役形之所然皆心之所有故欲味者胃緩而舌縱也不欲食者胃滿塞而舌痺也欲色者腎氣隆也老而好色衰者腎微也喜怒者肝邪也敢事而橫作者膽衡也難開以言者心內隱於肺中也易恐以言者心下而外出也操守不一無守司者心偏傾也狂者陽邪盛也少而狂老而衰者陽衰也責此之由皆五臟之過矣然則我何為乎誰為主乎氣之淫者陰盛夢涉大水陽盛夢火燔燭陰陽俱盛則夢爭殺毀傷上盛夢飛

下盛夢墮甚飢夢取甚飽夢于肝氣盛夢怒肺氣盛夢  
哭心氣盛則夢喜笑恐畏脾氣盛則夢歌樂體重不舉  
脈氣盛則夢要脊兩解不屬短蟲多則夢聚衆長蟲多  
則夢相擊若邪氣客于心則夢見邱山烟火客于肺則  
夢飛揚見金鐵之奇物客于肝則夢山林樹木客于脾  
則夢見邱陵大澤壞屋風雨客于脈則夢臨淵没居水  
中客于膀胱則夢遊行客于胃則夢飲食客于大腸則  
夢田野客于小腸則夢聚邑衝衢客于膽則夢鬪訟自

剗客于陰器則夢接內客于項則夢斬首客于脛則夢行走而不能前及居深池窈窕中客于股肱則夢禮節拜起客于胞臍則夢洩便以至事之所習皆然然則至人無夢果土缶耶抑所謂夢寤一如者乎王符夢列論則為占而言也

調火 陳霖春曰哀哉人也火焚而死今以兩木相摩久之得溫久之得火七情相摩甚於兩木陽火熾然獨用五行金始被傷無以子水木欺金弱往而害土齊荆

相攻宋乃舉曹造攻在火受兵在金二者為難震於其鄰失母不滋害稜於子受制自困飛馱於土載地之物水土為常土為元母水為之祖土之常制居中以養水之常制居底潤化二者大氣大氣既弊五行將息火害已遍初及其敵既其反覆適敗所託奸臣滅國恒自亡矣夫五惡同事得和乃處內得其和外得其平和平理成生乃留止和所以失皆責其過或過于外或過于內過于外者六氣之入與其飲食入之不精先投所家木類

入肝金類合肺一經受之傳於餘經間傳傳生七傳傳克傳生之類母得毒味以養其子傳克之類譬如虎被毒鏃怒而拔木盜賊已發引連怨家傳生者輕傳克者重過內之事獨於七情與其思慮大喜者心系緩弛心緩弛則氣解散氣解散則心自傷大怒者血騰溢血騰溢則氣拱急氣拱急則肝自傷大憂者志趣下志趣下則氣閉塞氣閉塞則肺自傷大恐者神失處神失處則氣掉動氣掉動則腎自傷多思者引系急則氣來聚氣

來聚則心脾自傷五者之來思為無已撮緣外象取景  
為實以故為經轉而測變喜怒憂懼思皆與謀多智之  
物常以思害而閉距無思又成艮限之害蘇子曰思之  
於人微而無間也怵惕思慮者神傷神傷則恐懼流淫  
而不正因悲哀動中者則竭絕而失生喜樂者神渾散  
而不藏愁憂者氣閉塞而不行盛怒者迷惑而不治恐  
懼者傷憚而不收數者之來皆害和平與內與外朋來  
狎至此生道所以危人者非物之類也物之生天地之

有也人者已之有也心者君主之官神明出焉故立其  
君主生道從矣是故謹其門戶要其出入迎其所可卻  
其不可利害居先情欲居後而條理其中寂歷不亂心  
治者身治矣心治者國治矣國治治生所託者也身治  
治其托者也此養生之要道黃帝之所以百年居世去

而上神也

中通曰人身水不勝火一說也通謂骨肉血脈皆水也而陽火運之非水多火少耶蓋少

火能勝多水也飲食生精血即以生氣可悟陰陽互根陰奉陽而養陽者也中履曰舊云理水性火水靜火動履謂性彌水火理綸動靜當以中旁條達知極知節論之  
兆充曰君火在上相火異乎水而上行是既濟

也火偏燥則尅水水竭而  
火無所與藏反以自害矣

火與元氣說 繆中淳曰水為陰精火為陽氣陰陽和  
平少火生氣則諸病不作矣不善攝養陰虧水涸則火  
偏勝陰不足則陽必湊之是謂陽盛陰虛亦曰壯火食  
氣是知火與氣一也仙經謂藥即火火即藥譬水本寒  
流過極則凝而不流為層冰矣解則復常非二物也蓋  
平則為水火既濟當斯時也火即真陽之元氣矣及其  
偏也則即陽氣而為火也始與元氣不兩立而乖否矣

其論陽常有餘陰常不足則丹溪之說也陽生陰則東

垣之說也合而觀之性命之理亦可以見

中通曰有形之火水所克

也無形之火乃水所生

水火反因人身尤切 或問水火反因可得詳乎宓山

愚者曰冷熱其本情也乾溼其所就也水內景火外景

水有體火無體火用之而多水用之而少皆相反也實

相因也乾與熱為火乾與溼為土溼與冷為水溼與熱

為氣言其蒸也火燒冷水而熱久之復冷是陰無去來

以陽之去來為去來矣。氣動皆火，氣凝皆水。凝積而流動不停，運其交藏何在？豈非土與空之為用乎？火空則發水，附土行然。空中之氣皆水土中之蒸，皆火也。別而言之，五星具矣。而日月為真水，火心肝脾肺腎配五行而運行五臟六腑間者，何物乎？中通曰：趙氏恐人泥心火腎水不求其故已也。故曰有無形之水火行陰陽各二十五度而根原于先天太極之真也。然彼又詎知五行本二而二即一耶？又進而言之，兩間惟太陽為火，而月五星皆屬水。人身骨肉血脈皆水，惟陽火運之則煖煖。氣去則死矣。然五

志皆火惟一腎水水常不能勝火何也蓋火之一分足敵水之十分豈可以平半為稱乎又進而言之精氣皆水也神火也又進而言之神不離精氣惟別而知之斯貫而理之精無人神無我致中和者享之矣

陳希夷曰坎乾水也

氣也泉也兌坤水也形也雨澤也潤萬物者蓋氣之液也仲秋水始涸仲冬水泉動不可悟真水乎命門小心為三焦周身之主非真火乎人生之緣水火一處不可推乎

陰陽互根而析徵 負陰抱陽而背陽腹陰上陽下陰而腎陽心陰沉手足各三陰陽乎醫言氣陽血陰而氣

中有陰陽心火腎水而腎中有水火丹溪謂陰常不足  
正謂陰精非泛指陰血也張璠曰寸以候氣尺以候血  
蓋陰精主血也氣從上而旋故寸候之太淵肺部氣統  
氣血更何疑乎診視者不可泥一說之陰陽尤不可執  
冒總一句而不攷細差別以互徵之也六淫湊襲可以  
寒熱藥攻之真元致病即以水火之真調之然不求其  
屬投之不入先天水火同宮火以水為主水以火為原  
故取之陰者火中求水其精不竭取之陽者水中尋火

其明不熄經曰諸寒之而熱者取之陰諸熱之而寒者  
取之陽所謂求其屬也王太僕註曰寒之不寒是無水  
也熱之不熱是無火也無水者壯水之主以鎮陽光無  
火者益水之原以消陰翳

六味八味  
凡可推

細分陰陽為五而

五各有五約以水火言陽火日陰火燈木火以坎水滋  
養故火不外見金中火如鑛山發光土中火則蒸收生  
物如硫礬其專結也水中火則海火夜光類也陽水為  
泉陰水為澤木揉汁水金石生潤汞其一類皆土中出

也龍火行雨非火中水乎人身肝火內熾鬱悶煩躁須以辛涼發達之寒藥熱藥皆不可也命門火衰腎中寒甚龍火無藏身之位遊于上而不歸故有上焦煩熱欬嗽喉病等症引之歸原可也而治陰虛火衰者乃執黃柏知母以寒之乎

咽喉如曲突火炎若以水自上灌下曲突立爆烈矣惟竈床下以盆水映

之上炎即熄此上病療下之驗

燈宜膏油養之入寒水則滅矣惟六氣

暑熱可以寒涼解之如河間所論若爐中之火乃炭土無焰之火得木則烟見溼則壞須以炭培之實以溫保

之人身脾土中火以甘溫養而自退矣金火為肺火毛  
孔如針刺巔頂如火炎者此肺金氣虛也經曰東方木  
實因西方金虛也補北方水即已瀉南方火此則通治  
五行之火矣人之飲食入胃命門之火蒸腐水穀其氣  
熏肺肺通百脈水精四布上達皮毛為汗為涕為唾為  
津下濡膀胱為便為液而血亦水也以隨相火行故其  
色紅周而復始此所謂火生水也骨中之髓則如鑛中  
汞木中膏脂則如足下有湧泉穴肩上有肩井穴此暗

水潛行之道也其所以晝夜不息者以一元之乾氣耳

經曰紀于水火餘氣可知

中通曰趙氏謂脾胃中氣為後天以東垣補中益氣湯主

之以腎命水火為先天以仲景六味八味主之太西以腦心肝立論腦與精一原也以大道言之精氣皆後天也神先天也而理在其中矣心臟身身藏心天無先後誰悟此乎

血氣自靈

人肉自靈不專恃心矣故觸之即覺有故

先跳皆靈之在膚者夫牛羊被殺其角以耳就之淅淅有聲死龜猶嚙縣其肉無人而縱見人即縮殺鰐而縣其首其齒自生豈有使之者乎雷書曰本於骨肉緣起

心性性止氣之事氣但肉之事物之相啖者肉氣亦相  
制精粗同理曾窮之否影之於形翳光而如其餘者也  
鍼灸以取神工或以起疾含沙而射短狐或以中人是  
則去身之物尚亦關身也耶中通曰人物得天之靈氣以生既生則靈氣充貫體  
中心固靈毛膚血肉無往不靈心特為靈氣之主耳故  
過思則髮必開大恐則毛必豎父子之血自相合著人  
之鼻可辨金他如屠案豕肉移時而肉尚驚斷尾守  
宮身去而尾尚躍可見一切皆心者皆此靈氣也

人身營魄變化 人身小天地四大升降生息無刻有

停無論臟腑之傳送停泄與風雨露雷相應即皮膜之

間一小筋皆有為而生飲食所納初化為膏飴再化為精液皆藉真火甄鎔最粗則後降火必求妃妃乃在水陰實則坎離交陰虛則陽燄騰如天地之火非藉水土壅合以利民生則橫驚颶發不可禦矣至于我之靈臺包括縣寓記憶今古安寘此者果在何處質而稽之有生之後資腦髓以藏受也髓清者聰明易記而易忘若印板之摹字髓濁者愚鈍難記亦難忘若堅石之鐫文人身命根奚託任督之脈玄牝之門與天地同天地內

外莫載莫破宰人身者膚骨內外無歟無羸而究竟莫測其何象也謂之真宰

毛髮

鄭厚曰髮屬心火也故上生鬚屬腎水也故下

生眉屬肝木也故側生貴人勞心故少髮癩者風感落木故先禿眉張仲景知王粲眉落是也蠡海集曰三魂七魄者洛書三居東七居西東為木主藏魂肝也西為金主藏魄肺也目居上上者動天氣運于上也口居下下者動地氣運于下也人之毛乃血之餘三陽之毛皆

顯于首太陽之毛髮也少陽之毛眉也陽明之毛鬚也  
太陽居上少氣多血少陽居中少血故眉自幼即有而  
不能長陽明居下多氣多血故既壯始有而亦能長以  
是知緣血然也媚人無鬚者蓋衝脈並陽明行月事以  
時去使陽明之血不能充所以鬚不生也宦者傷其厭  
陰之絡耗其陽明之血元不足也三陰之毛皆潛于體  
太陰指毛也少陰腋毛也皆少氣多血故不能盛厥陰  
陰毛也厥陰少氣多血而獨能盛然三陰之毛幼皆無

既壯而後生髮世傑草木子云精之榮以鬚氣之榮以眉血之榮以髮

魄結 雉經繩主顛狂宋羅點聞見錄云凡自雉經之地下必有如麩炭者日深一日速掘之則禍止此蓋如虎死眼光為白石也

髮用 生人髮緯車上則迷亂不知所適若掛果樹上鳥不敢食其實人棄髮合雞子黃煎則化為水可療小兒驚熱熱瘡入鼻衄甚燒髮末吹內鼻中則止人誤吞

髮繞喉自拔髮燒之水服二鉢凡棄髮宜入膏藥

洗垢法 蒸浴發散最捷然陽弱之人傷氣內經曰烟垢落賊風入深此一理也臍以下宜椒浴足宜夜浴最養人面則日盥爽神指甲內垢以白梅與皂角洗之漆在身手洗不去以油洗之桐油黏手稻草末擦之

緩筋法 古云書櫛緩筋木瓜能治腳氣櫛木瓜也今

俗人見足麻則一草貼眉上凡人身上升筋以木屨三

擊之自散

中履曰一心試法久而筋舒然心定則氣血和此理不可忽也

忍溺法 加餉糖結末作膏貼會陰穴則溺不出川椒紅與芩九服久則溺少川椒口白目如漆光不光者閉氣復生別症吉刺重耐以紅花芩胡桃入麴釀者醫漫數效

白肌法 安福衡衡畜小唱白席其黑者以糟浸之葛洪曰女苑三分鉛丹一分為末醋漿服一刀圭日三服三日大便黑十八日面如漆二十一日全白年三十後不可服名醫錄宋醫治任氏女效老則無益矣聖濟總

錄冬爪竹刀去皮酒和水熬膏夜塗面自白其爪練亦  
去黥黜斗門方用白殭蠶黑丑末為澡豆又李核仁和  
雞子白塗面去黥古采桃杏花合香盥醕取其意耳因  
有上已收桃花七夕收雞血塗面之說

中德曰晨摩掌熱以摩面有光

彩  
驗

射影炙影 柯古曰寶歷中有王山人取人本命張燈  
相人影知休咎不欲照水照井及浴盆中古人避影亦  
為此蠟螭短狐跼影蠱皆中人影為害近有人善炙人

影治病者愚者按南史張邵傳後徐文伯祖秋夫為芻  
人以鍼鬼又有薛伯宗徙癰疽為氣封之徙置柳樹上  
異苑載王僕以水澆枯樹而鄭鮮之女孿遂愈近日鍼  
灸人影者乃先以指藏毒藥向人痛處按之然後灸影  
則人膚上痛耳

包絡三焦 手中指陰陽也痘疹中指先冷十一臟用  
此包焦也心系五臟則包絡五臟矣三焦絡外關胃腕  
闌魄可分三段通身膜絡亦分三段決瀆為近膀射泄

因命火

陰陽仰伏

褚氏曰男面重女背重溺死驗之走獸溺

死伏仰亦然

骨節中有涎

人骨節中有涎所以轉動滑利中風則

涎上潮咽喉裏響以藥壓下俾歸骨節可也若吐其涎  
時間快意枯人手足縱活亦為廢人小兒驚風亦不可  
吐涎

驗傷法

皇甫牧玉匣記李處厚言驗傷以糟或灰湯

薄之都無傷跡若以新赤油繖日中覆之以水沃尸其跡必見無骸尸于舊停處布熱灰作人形祀而散生豆其上有傷處豆自爆

留屍法 李預服玉其尸暑中不殞黃金塞竅亦不腐灌頤更效或以茶潑頤納鼻亦可暑中不殞漢書言汗辱呂雉尸以水銀斂也字露國有一拔爾撒摩樹脂塗尸千年不朽確辨錄曰有徒以坐脫販其師者礮合婆律也乾頤納鼻而稱香熏為肉身者也寡欲恬澹氣盡

而逝心不係戀煖從頂脫尸為遺蛻久之自乾小乘專  
致常然豈足怪乎骨剛者不壞志凝精結有成塊燒不  
壞者此舍利子之所由來也物理所曰童男髮根可黏  
起舍利乳香久留能生舍利

驗妊 物類志曰將斧潛于妊牀下斫之必生男試將  
斧于雌雞欲卵時可驗也舊有佩雄黃精衣冠照井之  
說此亦與胎教同其意耳無意中呼妊者回頭過戶限  
視其左右以知男女孕婦食桑椹復食雞鴨蛋子橫生

食薑子六指在孕恒聞鷹鷄聲生子不畏雷未產曰陰  
經方動而交則子生髮白肝枯俗名社公皆氣之不純  
焉耳經曰陰搏陽別謂之有子按尺內也以左右辨男  
女醫曰心脈動如豆大肝脈滑而兩尺甚者妊也命門  
旺為男胚心動肝滑而兩尺弱者別病也

世傳老人子無影 南史張元始及朝野僉載曹大年  
邴吉以此斷之唐張鷟耳目記柳州曹泰八十五生子  
曰曾日中無影曾年七十方卒張孟奇言今不驗則遂

有帷薄之疑又言腎囊下筋謂之影智以為甚言其精衰耳老人亦有強於後生者或曰一歲中其影彷彿及長血氣自旺則與人同

氣感 黎久曰有處女孕者其家訊掠百至而卒無明驗也或神交氣交或精交女國照井而孕亦氣交之理乎外紀韃而勒西有女國曰亞瑪作搦俗惟春月容男子一至其地生男輒殺之

鼻息定時 鼻中氣陽時在左陰時在右亥子之交兩

鼻俱通道家所謂玉洞雙開是也胚惟鼻祖命門為環  
自心生死之籥詳前

兒不啼不語 兒生墮地不啼擊木瓢迫猶令叫即啼

兒語遲取鵲所蹋枝鞭兒即語

中通曰俗稱不啼兒為悶寂生旁人呼其父名

父應兒  
即啼

止小兒夜啼法 井口邊草安小兒卧薦下止夜啼又

按異術云截竹七節者一段以紙書小兒八字封其中  
勿令人知置小兒卧處則兒不啼聖惠方云縣鏡于牀

足則止

止兒驚法

拔劍倚戶兒不夜驚懸軒轅鏡則無氛魔

兒啼占

相兒經曰初生聲連延相屬者壽聲絕而揚

急者不壽啼聲散與深者不成人

尸忌

雜俎曰忌狗見屍今有重喪又云送亡者不齋

鏡奩蓋

救溺人法

華佗肘後方云以灰覆溺人首上灰溼復

易之自活又方裹石灰納穀道中水自出

父子合血 父子滴血則合南史孫法宗滴血尋父尸  
蕭綵發東昏冢刺血滴骨又殺已子試之乃奔北魏相  
思螺郎居子石燕且相就而況父子一氣血不相就乎  
綜止知滴骨之法而不知水中合血之法故多殺一子  
專房十年篤者滴血亦合

大驚離魂 恐傷脹而心神走也熊魚山直言拜廷杖  
時愚省之西庫中問當時作何狀云身在空中下視一  
人受杖故小兒驚則失神俗諺五月人蛻若上屋見影

魂當去古有祝由科丹砂作符填心正謂人心有不自知不自由者藉諸呪力加持皆此故也

生物貴真陽 龍川別志張安道攜醫入五局觀見一

道人曰元氣重十六兩漸老而耗因出藥二丸且以一試之納汞一兩于銚盞蓋之札札有聲以松脂三投紫燄而藥成少夫曰是煉硫鉛所成老宜補陽而已仇池記晉武時人墜洛洞見龜服日光倣之不饑後得出今種用日暴火養而頃刻開花則藥作銀卵而火養之其

為用也明矣

人異 向稱穿窬飛首大人小人神異經言北海人長  
二千里殆如稱修羅乎若王莽時巨無霸則見漢書者  
也山海經小人國有犂臯之尸神異經言鵠國人七寸  
嘗畏鵠吞西北荒人長一尺異苑載張仲師長尺二寸  
東方朔知巨靈之類是也王世懋二酉委譚言徐方伯  
時在甘州張大參在涼州破土得小棺二三尺啟視須  
鬢老人多紗帽紅袍者衆喧然遂止以祭文掩之二君

皆目擊可信人也存而不論寧獨六合外哉馬觀曰占城國有女人目無瞳夜寢飛頭食人家小兒則飛首之說可類推也外紀言一種鬚眉畢具特手指相連如鳧爪又喝蘭達地曾于海中獲一女人與食亦食亦肯為人役使但不能言其一身有肉皮下垂至地如衣袍服者中通曰至于雌雄異類有情無情之變則綱目人鬼一篇悉矣自顯而言皆氣蒸之所造而化也自微而言皆意識之所造而化也聖人知其故而明其理以化之意識習氣用歸中正一切物理皆不足以驚之此所以動蹟而易簡也

積想出神 破色心論曰實無而成智證傳言晝夜念

須臾那等便夢與之從事因悟一切諸法皆如是也專

氣致柔久亦有出神事不可不一看破中通曰心體本無也隨習專而

成聖人知之一見永不再見惟與萬世混于當務而已  
中履曰心官正用曰思徇相曰想學以濟思即以泯  
想

人生通理 語曰北人包頭南人束腰泉漳人赤足著履而包頭冬

則肚暖夏則肚冷龔者語闕啞者多笑其驚無唾甚愧

脫頤縱樂神耗太恐精流手甲自傷忌水與露以齒齧

物其瘡毒深頭垢搔燒卻蜈以解毒也拔鬚叩齒勝鬼  
以壯神也然毒以元氣靜正而自解神以不可知而更  
壯醫悟此乎潛草曰強弱本乎父母仁智擴于教學頤  
養因乎窮通色脈關乎憂喜日度既分溫冷山川亦別  
粗秀氣化之淳天稟人習皆然舉所不知則駭直告其  
故反疑人者天地之心精義入神利用安身其最切也  
醫貫三才人子須知易徵節度此身為要

參同契

魏伯陽以易衍真丹正理玄施黃包匡廓轂

輻紀綱鄧鄂律歷應符龍虎兩弦流戊就已兌坤得朋  
享其乾元伏逆化機本冒如斯者也陳抱一發揮一堅  
密身名曰金丹築基煉已緣熟本忘彼黃治容成竊以  
炫媚耳朱子曾註之宓山愚者曰兩折三番之火候混  
中用二之交輪坎離濟化大道固然一鏤凡一革囊大  
小皆符者也聖人與民當務而已守尸鬼窟大乘呵之  
漢志老莊道家神仙方技也

胡映日曰朱子卦變合列  
一圖禘卦參同無不妙叶

仙橋老莊養生  
牆仙曷怪焉

物理小識卷三